


LUKUMU YA BANA ⁴

 Mpangi Neville, mpe midi ya mbote, nkokila ya mbote, mu zola tuba, na bankundi ya beto ya luzolo, beto ke na kiese na kuvutuka awa na yinzo-Nzambi na nkokila yayi. Mwini ke fioti ngolo, mpe na yawu beto ke meka na kusala nswalu na mutindu nionso, samu na kukota mbala mosi na Nsangu.

Ntete, beto ke na mazabusu ya kusala, mpe lombilu ya kisambu ya mutindu yankaka. Mu kuzwaka mikanda ya beno kuna, yina ba pesaka, mpe ya ke na mpangi-kento yina ke kukiwa ti ya ke na tumeur na yintu. Mpe ya vwandaka na yankaka na Louisville; mpe mpangi-bakala yankaka ya longi, tata ya yandi vwandaka na kukangama ya ntima; mpe ya ke na bambevo mingi, mingi na yinza bubu yayi. Mingi ke na kubokila mpe beto ke na kivuvu ti beto ke sambila samu na bawu na ntima ya beto ya muvimba, ti Nzambi ke sadisa beto.

Ntangu nionso pene ya makumi nana na tanu ya ministere ya munu ke vwandaka, kusambila samu na bambevo, beno me mona, kasi mu—mu ke ndimaka ti—ke ndimaka ti. . .Mu ke sambilaka kaka samu na bambevo, ntangu yayi, beno bambuka yawu. Ya ke tambulaka kintwadi. Kasi, oh, kana beto lenda nata dibuundu na kubaka kisika ya yawu, na yina, mpe na kuvwanda na ndonga na mutindu ti beto lendaka sala, beno me mona. Beto fwana kukibongisa, beno me mona, samu ti mambu nionso kuvwanda kintwadi.

Kima yankaka simbaka ntima ya munu, na mwa minuti fioti me luta. Ya ke ntangu mwa kiboba mosi munwani-mvita ya ntama, mosi ya maboko na yandi zenganaka na masasi, dikulu kuzenganaka na masasi. Ya kele awa ve samu na kuwa munu na ntangu yayi. Kasi mwana-ntinu mosi ya kieleka, na nkumbu ya Roy Roberson, mpe mosi ya ba-administrateur ya beto awa na dibuundu, mpe Muklisto mosi ya mbote mingi. Yandi kwendaka kuna, mpe yandi tubaka, “Mpangi Branham, kuzimbana Ntwadisi ya yinsi ve.” Yandi tubaka, “Ya salaka munu mapi mingi na ntima ntangu yandi kwisaka,” ya monaka yandi na television, “yandi vwandaka kulumuka na avion, masa ya meso vwandaka kulumuka na matama ya yandi, mpe yinwa ya yandi ya kubaluka na lweka.” Beno zaba, yandi vwandaka kuna na Roy mpe bayankaka, na bitumba yina—yina.

Yina ke sala diambu ve kana beno ke swaswana na yandi na mambu ya politiki, yandi ke kaka Ntwadisi ya yinsi ya beto. Yinga, tata. Samu na munu, mu ke—mu ke Démocrate ve to Républicain. Mu ke Muklisto. Kasi mu—mu ke tuba na beno, ya kieleka mu ke sepelaka mingi na—na Ntwadisi ya yinsi Dwingt Eisenhower. Tata, ya kieleka yandi vwandaka muntu mosi ya

nene, na mutindu ya munu ya—ya kubanza. Kana yandi tula diaka nkumbu ya yandi, mpe mu ke pona yandi, mu ke pona yandi diaka. Ya kieleka. Ata ti yandi vwandaka—ata ti yandi na bamvula nkama mosi, mu ke pona yandi kaka samu na yandi, samu mu ke zolaka yandi. Mpe beto bambuka yandi na bisambu ya beto na nkokila yayi.

J. T., ya kieleka mu sepelaka na lukutakanu yina ya kitoko, yina beno, nge na Mpangi Willard kusalaka na sabala yayi. Kana mu kotaka na kisika ya kuvwanda na nganda, beno niono zolaka kutuba, “Mbote mingi, Mpangi Branham ntangu yayi, beno zaba, kima *kingandi*.” Kasi ya ke mbote mingi na kuvwanda na nganda mpe kuwa beno, mutindu yina ve? Mbote mingi. Na yina, ya ke kitoko mingi.

Mu me kuzwa makabu ya mwa mabuundu, kana beno nionso me sepela na yawu, kana beno me kubama na kukuma ba-pasteur ntangu yayi, kana beno me kuzwa malongi ya beno. Mpe, na yina, mu ke kwikila ti ya ke mutindu yina, mpe beno ke ya kusiamisama. Mu ke na mosi na Oregon, yankaka na Washington Californie, na Arizona, mpe na bisika ya mutindu na mutindu. Mpe kana beno zola simbisa dibuundu mosi to kima mosi, na yina, awa kaka ke vwanda kisika mosi ya mbote samu na kubanda, awa kaka. Mpe ya ke na mioyo yina ke na kuboka bisika nionso, ata mpe kuna na bisika ya ba-Indien mpe bisika nionso beno zola kwenda. Beto fwana zaba yawu, samu mu ke kwikila ti beno bampangi me kangama na diambu yango ntangu yayi. Ya kieleka. Mu ke zolaka kaka kumona bawu kusala yawu.

Ya ke na Mpangi Ruddell kuna na bala-bala. Ya ke vwanda na lukutakanu, na mwa bilumbu fioti. Ya ke vwanda na balukutakanu ya reveil, Mpangi Ruddell. Mpe mu—mu ke bambuka moyo na ntangu mu vwandaka tindika mpangi yina ya ntwenia bisika nionso, samu na kusala ti yandi kangama na kusalu mpe yandi kulonga. Yandi vwandaka kukondwa kikesa. Yandi lendaka tuba, “Mu lenda kutuba ve.” Beno fwana kuwa yandi. Amen. Beno me mona? Beno zaba ve yina beno lenda sala kana beno bika Mpeve-Santu me simba beno. Ya kieleka.

Mpe Mpangi Graham Snelling na Utica, mpe Mpangi Junior Jackson kuna. Beto—beto ke baka bawu nionso mutindu mwa mabuundu ya bampangi, yina kele na beto. Beto nionso kele kintwadi. Beto me swaswana ve na malongi ya beto, to bivuvu ya beto mpe balukanu, malongi ya beto, kele mosi. Beto kele na ngwisani, beto ke vukisaka mambu nionso kintwadi. Beto kele kaka dibuundu mosi. Mpe beto ke zola kuvwanda na bawu bisika nionso; beto ke na yankaka na Afrique, yankaka na Inde, mpe bisika nionso, na yinsi. Ya ke mutindu yina beto zola kumona bawu ke mwangisa Nsangu ya mbote.

Mpe mu ke mona bampangi yayi ya bantwenia ke kwenda na ntwala, mumbandu Mpangi J. T. Parnell awa, mpe—mpe Mpangi

Willard mpe bayankaka, ntangu ba ke kwenda na ntwala, bampangi yayi ya bantwenia, na ntangu mu ke na kununa. Kana ya ke na mbasi, ba ke vwanda babakala ya mbasi. Mu ke zola ata fioti ve ti Nsangu yayi kufwa. Ya lendaka kufwa ve. Ya fwana zinga kaka. Mpe mu ke kwikila ve ti beto kele diaka na ntangu mingi samu na kulonga Yawu.

Mwa bébé yina ba tubaka ti yandi zolaka kufwa, mu me mona ti beto me vwanda na yandi na yi nzo-Nzambi kilumbu ya muvimba bubu yayi, mpangi-kento. Yina ke mbote mingi. Beto ke tonda Mfumu samu na yawu, ti Mfumu kele ya lemvo, ya kufuluka na mawa. Beno landila kaka na kukwikila ti yina ba me tuba na beno awa, beno me mona, ya ke kuma mbote.

Ntangu yayi, beno ke sepela na malongi? Beno ke zolaka malongi? [Dibuundu me tuba, “Amen.”—Mu.] Oh, mu—mu—mu ke banza kieleka ti ya ke sala beto mbote. Ya ke pesa beto mwa kupema ya fioti na kusambila samu na bambevo, mpe ba-vision, mpe kubeluka ya Kinzambi. Na yina, ntangu yayi, na nkokila yayi beto. . . Na manima ya lukutakanu, beto ke sambila diaka samu na bambevo, na nkokila yayi. Beto ke zolaka kusala yawu, kubotika bantu na konso ntangu yina.

Bantu yikwa ke bambuka moyo na ntangu mu vwandaka kwenda makulu mwasi samu na kutala bansinga ya lotiliki ya ngolo mingi? Mbote, mu tambalaka makulu mwasi na kati ya bansinga ya ngolo ya lotiliki, na bantangu mingi, mu vwandaka tambula ba-kilometre makumi tanu na kati ya ntoto ya kuyuma. Mu vwandaka na bansinga ya kutala na ba-kilometre nkama yiya na makumi tanu. Mu vwanda tanbula kuna, na kinkuti na maboko, mpe, oh, mu vwandaka ya kulemba mingi, mu vwandaka tambula na kati ya bamfinda, mpe bansende vwandaka lwadisa munu. Mu kutanaka na fermier mosi ya kiboba mpe mu vwandaka na nsi ya yinti mpe mu solulaka na yandi samu na mbotika ya Nkumbu ya Mfumu Yesu. Yandi lendaka tuba, “Mbote, mu ke zolaka ntangu nionso kubaka mbotika.”

Mu tubaka, “Beto ke ntama mingi ve na masa.” Mpe yandi lendaka tuba. . .

Mpe mu me nataka mingi na kati ya bawu kuna mpe mu me botikaka bawu na Nkumbu ya Yesu. Mu vwandaka kwenda landila diaka nsinga, na nswalu nionso. Ya kieleka. Na bantangu mingi mu vwandaka na binkuti ya munu ya kisalu, mu vwandaka botika muntu mosi, mu vwandaka kulumuka na dikunzi mosi. Mu vwandaka kuna na zulu ya dikunzi ke sala kisalu; mu vwandaka yidika bansinga, mpe, mu vwandaka sala kisalu na zulu ya yinti na bakala mosi, mu vwandaka solula na yandi samu na Mfumu. Yandi tubaka, “Na yina, Billy, mosi ya bilumbu yayi mu ke kwisa kuna na dibuundu ya nge samu na kubaka mbotika.”

² Mu tubaka, “Samu na yinki nge ke zola kuingila tii kuna? Beto ke pene-pene ya masa, ya ke na masa mingi kuna.” Beno kanga bawu mbala mosi ntangu yayi. Ya ke mbote. Ntangu yawu yayi. Philippe tubaka . . .

³ Kalaki tubaka na Philippe, “Masa yawu yayi, yinki ke kanga beto nzila?” Ya kieleka. Kima mosi ve. Kana beno me kubama, ntangu yawu yayi. Beno bika ve diabulu kuzwa ntangu ya kukotisa kima mosi kuna. Kunata mbasi ve mambu yina beno lendaka sala bubu yayi. Mbasu lendaka vwanda ve samu na beno. Mu ke bambuka moyo mbala mosi ntangu mu salaka yawu, mu longukaka, ya pesaka munu dilongi mosi. Mu nataka na kilumbu yankaka yina mu lendaka sala na kilumbu mosi, mpe kilumbu yina landaka ntangu vwandaka me luta mingi.

⁴ Ntangu yayi, ya kieleka mu ke zola ve kukanga beno ntangu ya yinda. Kasi mu ke baluka kaka—kaka kisika mosi, mpe, mu zaba ve, mu ke kaka na nsatu mosi ya mbote mingi tii kuna mu ke basika kaka na nganda ya munu mosi, mingi. Mu ke na nsatu mosi ya mbote mingi.

⁵ Ntangu yayi beto kulumusa bayintu ya beto na mwa ntangu fioti na ntuala beto belema na Ndinga.

⁶ Tata ya beto ya Mazulu, Nge ke Nzambi ya moyo, yina ke zinga kukondwa nsuka. Mwini yina me dinda, yawu yina mosi, Daniel monaka yawu kudinda, Jérémie monaka yawu kudinda, Adam monaka yawu kudinda, Yesu monaka yawu kudinda. Mpe ya ke yinza mosi yina ba zingaka mpe ba tambulaka, mpe Nge ke kaka Nzambi yina mosi.

⁷ Na nkokila yayi ya ke na balombilu mingi. Bakala mosi na tumeur na yintu, mpangi-kento mosi ke na boma ya diambu yina mosi. Nge ke kaka kivuvu mosi, Mfumu, samu na yawu. Tumeur yango me kuma yimbi mingi, ya ke na kima mosi ve lenda kanga yawu. Ya me kwenda ntama ya maboko ya dokotolo. Kasi na nkokila yayi beto ke kwenda na mwa lanse ya beto, beto me kwenda sosa mwana-dimeme yina, samu na kuvutula yawu na lupangu ya Tata. Na Nkumbu ya Mfumu Yesu beto ke ludika kisambu ya beto samu na kufwa nkosi, tumeur, na mutindu ya yawu ya yimbi, samu na kunata bawu na lukengolo na kati ya lupangu.

⁸ Mpe beto ke bambuka moyo, Nzambi, na nkokila yayi Ntwadisi ya luzolo ya yinsi ya beto, mpangi, Dwight Eisenhower. Yandi me twadisa yinsi, Mfumu, yandi me meka na kukeba beto ntama ya mvita. Yandi silaka ti mvita ya Corée ke suka ti yandi lendaka sala nionso ya lendaka sala. Yandi silaka na bamama yina ti yandi ke vutula bana ya bawu ya babakala. Kasi yandi tubaka, “Kusala yawu munu mosi, mu lenda sala yawu ve. Mu lenda sala ngolo, kasi Nzambi kaka fwana sala yawu.” Mpe Nge vwandaka na yandi, Mfumu, mpe ntangu yayi ya me salama. Samu na yinki ba monaka yawu ve na kisika ya ntete? Nzambi,

mu ke sambila ti Nge ke sadisa yandi. Sakumuna moyo yina ya kikesa, Mfumu. Mpe beto ke sambila ti Nge ke pona samu na beto ntwadisi yina ke landa. Luzolo ya Nge ya mantwala kusalama, Mfumu.

⁹ Kasi Mosi yina beto ke tudila ntima mingi na nkokila yayi, na nganda ya bisalu ya beto ya yinsi, ya ke Mosi yina ya nene mpe ya nkembo ke na kwisa samu na kuvwandisa Kimfumu yina ke vwanda na nsuka ve, Mfumu Yesu, Mwana ya Nge. Na ntangu yina ba ke vukisa minduki, muningu ya kufwa tiya ke wakana mpe bamvita ke vwanda diaka ve. Ba ke kuna bilanga ya vinu mpe ba ke kudia mbuma ya yawu. Ba ke tunga bayinzo, ba ke zinga na kati ya yawu. Mpe ya ke vwanda diaka ve na bampasi na ntangu yina.

¹⁰ Sakumuna beto ntangu yayi na ntangu beto ke belema na Ndinga. Mpe, Tata, Nge zaba kikuma yina beto ke belema mutindu yayi na Ndinga ya Masonuku yayi awa. Ya ke samu ti mu—mu zaba ti Nge zola ti mu sala yawu mutindu yayi, ya ke luzolo ya Nge ya Kinzambi, ya ke na kati ya ntumunu ya Nge, ya ke na kati . . . ya ke ntumunu ya kilumbu, kusala ti bantu kumona kisika ya bawu mpe bawu vwanda ya kukubama samu na ngunga ya bitumba. Mutindu mpangi-bakala me tuba na Nge na kisambu ya yandi ntama mingi ve, “Oh, Nge me longusa beto ntangu ya yinda, Mfumu.” Ntangu yayi, Tata, pesa beto ba-grade ya beto. Tula beto kuna na kisika yina beto lendaka sala, na yina beto lendaka vwanda na kisalu ya Tata. Samu beto me lomba yawu na Nkumbu ya Yesu, Mwana ya Nge. Amen.

¹¹ Mu me vwanda na manima ya midi mosi ya kitoko na manima ya midi yayi, na kuzonzilaka dokotolo yina ya mbote na Louisville, infirmière ya yandi. Ba me kuwa mambu ya nkembo ya Mfumu. Mpe tata ya yandi vwandaka dokotolo. Mpe yandi kwisaka mpe ya me lutisa kitini ya nene ya manima ya midi ya yandi na bureau ya munu, yandi kwisaka, yandi kwisaka kutala munu. Muntu mosi ya mbote; na nkadulu ya ngolo fioti, beno zaba, ya kundimisama mingi, Presbyterien ya kieleka na kubanda, kasi ntangu ya kwendaka masa ya meso vwandaka kulumuka na matama ya yandi. Oh, mu . . . Nzambi ke na bawu kaka bisika nionso, na ba-bureau ya badokotolo, na ba-bureau ya ba-infirmière. Mu ke kwikilaka ve ti ya ke na infirmière mosi na Lupitalu ya Norton’s Infirmary yina mu me pesa ve kimbangi ya Mpeve-Santu, mpe mu lombaka yandi kana ya me bakaka mbotika na Nkumbu ya Yesu. Ata dokotolo mosi ve yina mu me solulaka na yandi, bisika nionso, to munt- . . . Beno me mona?

¹² Beno tubila bawu Yawu. Beto ke na ntangu mingi ve, mpangi-bakala. Ata ti ya ke monana mpasi awa, beno vingila fioti ntangu beno ke zabuka na simu yina ya pema ya beno ya nsuka mpe ntangu beno ke mona, na yina beno ke sepela ti beno salaka yawu. Yinga, tata. Beno vingila ve tii na ntangu yina, beno sala yawu na ntangu yayi. Ngunga yawu yayi. Oh, ba lendaka

wisana ve, mpe ba dasuka mpe swanisa beno fioti samu na yawu, kasi ba ke sala yawu ve na luzolo ya bawu. Ya kieleka ba zola sala mutindu yina ve. Ba—ba—ba ke na lutondo. Ba ke swanisa beno, beno bambuka kaka—kaka, ya kieleka ba—ba ke zolaka ve kusala yawu. Ba ke zola kusala yawu ve. Mbala yankaka ba me longusaka bawu kima mosi mpe ba ke kangama na yawu kaka, na yawu beno—beno lenda tala dibanza ya bawu. Beno swana na bawu ve, beno swana na muntu mosi ve, kasi beno zola bawu kaka tii kuna Ya ke ndimisa bawu. Na manima beno sambila samu na bawu.

¹³ Mbote, mu banza ti beto me mona tii na nzila ya yivwa, mu ke ndima ve. Beto kele diaka ntama na kapu 3, mutindu yina ve, bampangi? Kasi oh, Ya ke mafuta ya niosi na zulu ya ditadi, samu na munu! Beto vwandaka zonzila ntangu yayi, beno bambuka moyo, na yawu beto vutukila yawu fioti. Mpe ntangu yayi, Mpangi Neville, nge—nge ke kanga munu fioti ntangu yayi kana mu me kondwa kumona ntangu kukwenda, na yawu mu lendaka sambila samu na bambevo. Beto zola zonzila mwa nionso ya fioti-fioti kana beto lenda. Mpe na nkokila yayi mu zola sala lubokilu na autel. Mu . . . Beto ke manisa na yayi na yina mbala yankaka mu lendaka kutanga kaka yina me bikala.

¹⁴ Kasi kikuma ya yayi, kele, kumona kisika ya beno kati na Klisto, na kumonaka ti ya ke kima yina ve beno me kuma na kintulumukina, to kima yina beno lendaka . . . kima yina beno lunga kuzwa kisika mosi, kasi ya ke yina Nzambi me sala samu na beno, Yandi mosi. Ya kele ve ti samu beno vwandaka mbote mingi ti beno kwendaka na yinzo-Nzambi na nkokila mosi, ti mpangi-bakala mosi ya mputu kutwadisaka beno na autel. Mpe ya vwandaka mutindu yina ve. Ya vwandaka Nzambi, na ntuala yinza kusalama, ya zabaka beno na mantwala samu na Luzingu ya Kukonda nsuka. Ntangu beno ke kuma kuna kilumbu yina, kuyituka ve ti makumi yiya . . . bakuluntu kumi na zole na yiya kukatulaka bayimpu ya bawu, bawu nionso kukatulaka bayimpu ya bawu, bawu nionso kufukamaka na bizizi ya bawu na ntoto, ba vwandaka ve na diambu ya kutuba, mulongi mosi ve, kuluntu mosi ve, kima mosi ve. Lukumu nionso kele ya Mwana-dimeme! Nzambi ke vukisa kati na Yandi bima nionso kilumbu yina. Oh, kana beto lendaka zaba mpe kundima Nani ya vwandaka Yandi yina ba komaka na kulunsi. Ntangu yayi samu na . . .

¹⁵ Beto ke banda na nzila ya 8, samu na kubaka mwa dibanza.

Yina yandi me mwangisa na zulu ya beto na ndwenga nionso mpe mayele;

Na kuzabisaka na beto mansweki ya luzolo ya yandi, . . .

¹⁶ “Mansweki ya luzolo ya Yandi.” Mpe beno ke bambuka moyo wapi mutindu beto me telema mingi kuna? Bantu yikwa

vwandaka awa na suka yayi, beto tala. Beto me zonzila mingi, “mansweki ya luzolo ya Yandi.” Ntangu yayi, ya ke kima ya fioti ve, na yina ya ke mansweki. Luzolo ya Nzambi kele mansweki. Mpe muntu nionso fwana kusosa luzolo ya Nzambi kento to bakala, mansweki ya Nzambi.

¹⁷ Wapi mutindu beto ke kuzwa yawu? Paul, ba zabisaka yandi yawu. Yandi tubaka ti yandi kwendaka kuyufula muntu mosi ve, nsuni mpe menga ve. Yandi kwendaka na lukolo mosi ve, na seminere mosi ve. Yandi vwandaka na kima ya kusala na yawu ve. Kasi yandi. . . Ya monisamaka na yandi na Yesu Klisto, Yina kutanaka na yandi na nzila ya Damas, na kati ya Nsemo mutindu Dikunzi ya Tiya, mpe Yawu bokilaka yandi. Mpe yandi kwendaka na Arabie, mpe yandi vwandaka kuna bamvula tatu. Oh, beno banza ve ti ya vwandaka bantangu ya nkembo, Mpangi Egan? Bamvula tatu Paul vwandaka kuna na Arabie, ya vwandaka futila mwa yinzo mosi kuna, ya vwandaka kwenda mpe ke vutuka, na ba-rouleau nionso ya ntama. Ba vwandaka na yina ya malu-malu ve; Paul sonikaka yawu, ya kulutila mingi. Kaka na ba-rouleau yayi ya ntama, yandi sonikaka ti Nzambi, na mbandukulu, zabaka beto na mantwala samu na Luzingu ya Kukonda nsuka. Wapi mutindu Yandi lendaka fidisa Yesu, na mutindu ti na nzila ya Munkayulu yayi beto nionso lendaka vwanda na muswa na Yinti ya Luzingu. “Bayina Yandi zabaka, Yandi bokilaka bawu; bayina Yandi bokilaka, Yandi me nungisaka bawu dezia; bayina Yandi me nungisaka, Yandi me kembisaka bawu dezia.” Nzambi, kubanda mbandukulu ya yinza, zabaka beto na mantwala samu na lukumu ya bana. Ntangu yayi bivangu nionso ke na kunionga, ba ke na kuvingila kumonisama ya bana ya Nzambi. Oh, mu banza ti Paul kuzwaka ntangu mosi ya kitoko. Mu zolaka vwanda na yandi kuna. Beno ve?

¹⁸ Ntangu yayi yandi tubaka, “Yandi zabisaka beto mansweki.” Beno vwanda na Mpeve-Santu na zulu ya beno na ntangu mosi, mpe beno banda kulonguka Yawu mpe beno tala kaka mutindu Yawu ke salama. Na manima ya midi yayi mu vwandaka, oh, na minuti makumi tatu samu na kulonguka, kaka samu na kulosa disu na zulu ya dilongi yango; mbala yankaka ve, mu zola tuba kati-kati ya yawu, minuti kumi na tanu kati-kati ya bantangu. Mpe mu vwandaka longuka yawu, mpe mu banzaka, “Mansweki, wapi mutindu ya ke ya mansweki mingi!” Mpe Masonuku vutulaka munu kuna na manima na Ngwisani ya Ntama, na manima ya vutulaka munu na Ngwisani ya Malu-malu; ya vukisaka kima mosi kintwadi, samu na kumona mansweki ya Nkwizulu ya Yandi, mansweki ya luzolo ya Yandi, mansweki ya kuvwanda ya beto kintwadi. Beno bambuka moyo, ba lendaka longusa yawu ve na seminere. Ya ke mansweki. Beno lenda zaba yawu ve na nzila ya lukolo, na nzila ya théologie. Ya ke mansweki yina ba bumbaka kubandaka mbandukulu ya yinza,

na kuvingilaka kumonisama ya bana ya Nzambi.

¹⁹ Tuba na munu, mpangi ya munu ya bakala, tuba na munu, mpangi ya munu ya kento, yinki ntangu yina bana ya Nzambi me monisamaka ntete na nganda ya ntangu yayi awa? Yinki ntangu ya me vwandaka ntete na kati ya masolo, ba lendaka monisama samu na kukangula yinza ya muvimba? Yinza, yinza yawu mosi ke na kunionga, na kuvingilaka ntangu ya kumonisama. Mpamba ve, na ntwala mulemvo ya masumu kusalama, na ntwala Mpeve-Santu kutiamuka, na ntwala Ngwisani nionso—nionso ya Ntama, na ntangu yayi nionso, ya lendaka vwanda ve na bakumonisama. Ya fwanaka vingila tii na ntangu yayi. Ntangu yayi ba me nata bima nionso, ya ke na kukwisa, ya ke na kubaka kifwani tii na ditadi ya yintu, tii na bakumonisama ya bana ya Nzambi na ntangu ba ke vutuka, mpe Mpeve ya Nzambi ke kota na bantu yayi, na mutindu ya kulunga, tii kuna ministere ya bawu ke vwanda ya kufwanana mingi na yina ya Klisto tii kuna ya ke vukisa Yandi na Dibuundu ya Yandi kintwadi.

²⁰ Bantu yikwa me longukaka ntete disolo ya pyramide? Mu banza ti mama mosi me telemisa diboko ya yandi. Mbote mingi.

²¹ Nzambi sonikaka ba-Biblia tatu. Mosi ya yawu vwandaka Zodiake na mazulu, yina kele Biblia ya ntete. Muntu lendaka tala na zulu samu na kubakula ti Nzambi kele na zulu. Beno landa Zodiake, beno me longukaka yawu ntete? Ya ke pesaka mpe bansungi nionso, ata mpe nsungi ya cancer. Ya ke pesaka mbandukulu, ya nte- . . . lubutuku ya Klisto. Yinki kele kidimbu ya ntete na Zodiake? Mwense. Yinki kele kidimbu ya nsuka? Leo nkosi. Nkwizulu ya ntete mpe Nkwizulu ya zole ya Klisto, nionso yayi me sonama na kati kuna.

²² Na manima Biblia yina me landa kusonamaka, ya sonamaka na kati ya ditadi, ba bokilaka yawu “ba-pyramide.” Nzambi sonikaka na kati ya ba-pyramide. Kana beno longuka yawu, beno tala masolo ya ntama mpe bamvita, wapi mutindu ba vwandaka kutunga na ntwala ya kubeba ya yinza na mvula.

²³ Ya tatu sonamaka na zulu ya papié, Biblia, samu na yinza yayi ya nene, ya kulonguka mingi yina ke kwisa. Ntangu yayi, mutindu Nzambi me tambula na kati ya bansungi, beto kele na Leo nkosi. Beto me kuma na nsongi ya pyramide. Beto ke na kati ya Buku ya Apocalypse, na kapu ya nsuka. Bantu ya mayele me tuba ti beto me kuma na minuti tatu na ntwala ya kati-kati ya mpimpa. Oh, beno banza kisika beto kele.

²⁴ Mpe bakula ti, beto baka pyramide, ya ke mpasi ve. Ya me fwanana na triangle.

²⁵ Ntangu beto vwandaka na nsi awa na mbandukulu ya kubanda nsungi ya dibuundu, na manima ya Kusungika na ntangu ya Luther, kana muntu kumeka kutuba ti yandi vwandaka Muklisto, ya vwandaka diambu ya luzingu to lufwa. Ba ke kufwa yandi samu kaka ya me tuba ti yandi vwandaka

Muklisto. Na yina kumona mpasi...Na bansungi nionso, na bantangu nionso, ya vwandaka na bampasi. “Bayina nionso ke zinga na busantu kati na Klisto Yesu ba ke mona mpasi.” Na nsungi ya Luther, ya vwandaka mpasi na kutuba mu kele “Luthérien.” Ba vwandaka tala nge mutindu fanatiki, mpe ba lendaka kufwa nge. Na bantangu mingi ba kufwaka bawu na dikunzi mosi, ba vwandaka kuyoka bawu, mpe nionso yina, samu ba vwandaka ba-Luthérien.

²⁶ Na manima dibuundu kufiotukaka, mutindu pyramide. Ya kumaka na kitini yankaka ya lemvo, yina vwandaka kusantisama. Ntangu ya Wesley, ntangu yandi mangaka église Aglicane, ya longaka kusantisama. Ya kumaka diaka fioti, na manima ba bokilaka bawu nkonga ya bafanatiki.

²⁷ Bantu yikwa na kati awa vwandaka Methodiste, to yina vwandaka, to yina vwandaka mosi ya dibuundu ya ba-Methodiste? Kati-kati ya beno. Beno me zaba ti dibuundu ya ba-Methodiste vwandaka na Mpeve-Santu na ntangu mosi? Mu me kwendaka na bayinzo-Nzambi ya ba-Methodiste mpe mu monaka bawu kubwa na ntoto, mpe kulosila bawu masa na kizizi mpe kufula bawu mupepe na ventilateur, samu na kupekisa Mpeve-Santu kukwisa na zulu ya bawu ve. Ya kieleka. Ntangu yayi, ya kieleka, kuna na miongo ya Kentucky kisika beto vwandaka na ba-Methodiste. Beno bayankaka kele bandimi ya dibuundu awa. Beto vwandaka na ba-Methodiste kuna, na ba-Baptiste. Beto vwandaka kwenda kufukama na autel mpe beto vwandaka bulasana bambata na mukongo bamosi na bayankaka tii kuna beto ke kuzwa kima mosi. Beto lendaka sala yawu, na manima beto vwandaka zinga luzingu ya luswaswanu.

²⁸ Kasi beno kwisaka mpe beno me tula nkumbu ya beno na buku mpe beno me tuba, “Mu kele Methodiste.” Mpe ba ke baka bwati ya mungwa mpe ba ke losila beno mwa masa, mpe yimeni. Beno ke basika mpe beno ke lwata bakupé, beno ke tula maquillage, beno ke kwenda na mbangu ya bampunda, beno ke tula ntembe ya mbongo, beno ke sala bansaka ya mbongo, beno ke sala nsaka ya machine à sous mpe nionso yina, beno kele kaka ba-Methodiste ya mbote, beno me mona. Yina ke Methodiste ve. Yina ke kaka bandimi ya dibuundu. Ya kieleka. Ba-Baptiste, mutindu mosi, ba-Presbytérien, mutindu mosi.

²⁹ Mutindu David duPlessis tubaka, “Batekolo, Nzambi ke na batekolo ve.” Nzambi ke vwandaka na mutekolo ata fioti ve. Yandi kele na bana, kasi batekolo ve. Ya kieleka. Beno... mpe bantu yina ke kwendaka na dibuundu ya ba-Methodiste, to dibuundu ya ba-Pentecotiste, to dibuundu ya ba-Baptiste, samu mama ya beno to tata ya beno vwandaka Pentecotiste to Baptiste, na yina beno kele mutekolo. Ba vwandaka bana. Beno kele mutekolo, beno me mona. Na yawu Nzambi ke na kima ya mutindu yina ve. Dibundu ke na mambu mingi ya mutindu yina, kasi ve—kasi ve—ve—ve... Nzambi ke na yawu ve.

³⁰ Ntangu yayi, beno bakula ti, mambu tambulaka mutindu yayi tii na ntangu, mutindu ya me kuma fioti, dibuundu. Nsungi ya Pentecote kwisaka. Ya kieleka ya sungikaka mambu mingi. Na manima yinki ya salaka? Ya bikaka kaka ba-Methodiste mpe ba-Luthérien bawu nionso na manima.

³¹ Ntangu yayi Mpeve-Santu me landila na kukwenda na mutindu ti ya me kwenda ntama ya nsungi ya Pentecote. Yinki bawu salaka? Ba salaka organisation, bawu mosi tubaka, “Beto kele ba-Assemblée ya Nzambi.” “Beto kele ba-Unitaire.” “Beno kele ba-Binitaire.” “Beto kele Dibundu ya Nzambi.” “Beto kele yayi, to yina. Kana beno kele mosi ya beto ve, beno lenda kota na Zulu ve kukondwa nkumbu ya beno kuvwanda na buku ya beto.” Oh, buzoba ya mutindu yayi! Mu ke kipe ve kana beno kele Baptiste, Methodiste, Presbytérien, beno ke tula nkumbu ya beno na Buku ya Luzingu ntangu Nzambi ke tula yawu kuna. Kana ba zabaka beno na ntwala samu na Luzingu ya Kukonda nsuka, Nzambi ke bokila beno na mutindu mosi, na mutindu nionso, na mutindu—na mutindu mosi to yankaka. Ya kieleka Yandi ke sala yawu. “Bayina nionso Tata pesaka Munu ke kwisa na Munu.” Mu ke kipe ve dibuundu yina beno ke vwandaka, yina ke sala kima mosi ve. Kasi denomination ke sala ata fioti ve kima mosi samu na beno, kasi ya ke tula beno nkakalakani na kutambula ya beno na Nzambi, kasi ya ke—ya ke sala ata fioti ve kima yankaka. Ya ke sala ti beno vukana kintwadi na nkonga ya bakwikidi mpe mimpani. Na yina, beno ke monaka yawu bisika nionso beno ke kwendaka, mpe ya vwandaka mpe mutindu yina na Zulu. Na yawu, ya ke mbote mingi, kasi beno ke tala kaka na denomination ya beno. Beno tala na Yesu, Yandi kele Yina beno fwana tala.

³² Ntangu yayi mutindu beto ke na kukulumuka na...ba vwandaka...Bantu yikwa...Mu ke kwikila ti kento yayi awa me telemisaka diboko ya yandi, ti beno me longukaka ba-pyramide. Beno zaba, pyramide ba me zengaka yawu ata fioti ve, mutindu yina? Ya me vwandaka ata fioti ve na ditadi ya nsongi na zulu ya yawu. Ata fioti ve, ba me monaka yawu ve. Ba me zaba ve yinki salamaka na yawu. Samu na yinki? Samu na yinki ba me tulaka ve ditadi ya nsongi na zulu ya yawu, ditadi ya yintu, na nsongi ya yawu? Samu ba losaka Yandi ntangu Yandi kwisaka. Yandi vwandaka Ditadi yina ba losaka. Ya kieleka. Kasi ba ke zenga yawu. Ya kieleka. Na yina matadi yina ke kwelana na Ditadi yina ya yintu, fwana vwanda matadi yina ke fwanana na Ditadi yina na mutindu ya kulunga, ya ke kwelana na yawu, na nionso—nionso. Pyramide ke ya kulunga mingi na mutindu ti beno lenda kotisa ve lutebo kati-kati ya yawu, kisika matadi yina me vukana kintwadi. Lutungu mosi ya kitoko mingi. Yankaka na kati ya yawu lendaka vwanda na kizitu ya bankama ya ba-tonne kuna na zulu, mpe ba vukisaka yawu kintwadi na mutindu mosi ya kulunga.

³³ Ya ke mutindu yina Nzambi ke na kutwadisa Dibuundu ya Yandi. Beto me vukana kintwadi, na ntima mosi mpe na ngwisani. Ntangu yayi muntu mosi ke tuba, “Mbote, ba-Luthérien kuna vwandaka na kima mosi ve.” Beno kwikila yawu ve. Ba-Luthérien ke vwanda mpe na mvumbukulu ya bafwa mutindu mosi na bayankaka ke vwanda na mvumbukulu ya bafwa. Ba-Baptiste, ba-Presbytérien, mpe bana ya Nzambi nionso, ke vwanda na mvumbukulu yina ya bafwa. Mpe kikuma yawu yina bubu yayi bantu ke tuba, “Oh, mbote, ya ke vwanda na reveil mosi ya nene kuna yina ke vulusa bankama ya ba-million ya ba-Pentecotiste. Bawu nionso ke vuluka mpe Enlevement ke salama.” Beno me sala kifu. Na Enlevement ya ke vwanda na bankama ya mafunda, ya kieleka, kasi ya ke vwanda mbuma ya bamvula mafunda sambanu ya mpulusu mpe, bamvula mafunda sambanu me luta. Muntu ke tambulaka na Nsemo na mutindu Nsemo ke kwisa na yandi, ya ke zabukaka bakiamvu ntangu ya ke kwisa na yandi. Ntangu yayi, kana yandi manga Yawu, na yina yandi ke bikala na kati ya mudidi. Kasi kana yandi landila na kukwenda na ntwala!

³⁴ Ntangu yayi, beno tala, na yina Nkwizulu ya Mfumu Yesu me kuma pene-pene mingi na mutindu ti Mpeve yina bandaka awa na nsi. . .mwa fioti na lunungu, kusantisama, mbotika ya Mpeve-Santu, mpe ntangu yayi ya me kuma ntangu ya nkwezulu ya Ditadi ya yintu. Dibuundu fwana vwanda ya kulunga mutindu Klisto na mutindu ti Klisto na Dibuundu lendaka vukana kintwadi, na Mpeve mosi. Mpe kana Mpeve ya Klisto kele na kati ya beno, Ya ke sala ti beno kuzinga luzingu ya Klisto, kuzinga luzingu ya Klisto, kusala bisalu ya Klisto. “Yandi yina ke kwikila na Munu, yandi mpe ke sala bisalu yina Mu ke sala.” Yesu tubaka mutindu yina. Beno me mona? Ntangu yayi beto ke vwanda, beto ke na ministere ke kwisa yina ke vwanda kieleka mutindu luzingu ya Klisto. Yinki ministere yina ke talisa? Nkwizulu ya Mfumu.

³⁵ Beno tala yawu na yinza bubu yayi, mpe beno tala yina Khrushchev me tuba, bima yayi yankaka nionso ya nene, mpe kukondwa kuwakana ya nene na yinza ya muvimba, na ntangu nionso, lendaka panzana na putulu na konso sekonde yina. Ya kieleka. Mpe kana yayi, beto zaba ti ya me kuma pene-pene. Muntu nionso yina kele na bumuntu lendaka tanga na zulunale to lendaka kuwa na radio, mpe kuzaba ti ya me kuma pene-pene. Mbote, beno bambuka moyo, Klisto ke kwisa kusosa Dibuundu ya Yandi na ntwala yina kusalama. Na yawu wapi mutindu Nkwizulu ya Mfumu Yesu me kuma pene-pene? Mbala yankaka na ntwala lukutakanu yayi kusuka na nkokila yayi. Beto me kuma na ntangu ya nsuka. Ya kieleka kaka.

³⁶ Beno tala dibuundu mutindu ya ke kwisa, mutindu ya ke kwenda. Beno simba yawu kaka na mabanza ya beno, beno bantu ya masolo yina ke longukaka masolo. Beno tala dibuundu ya ba-

Luthérien na nsi ya lunungu, yina me katuka na kubasika na dibuundu ya Catholique, beno tala yawu mutindu ya ke kwenda na ntwala. Na manima beno tala Wesley yina kupusanaka mwa fioti mingi, na kusantisama, na kukotaka mwa fioti na Masonuku. Beno tala kaka na kati-kati ya yawu, nsungi ya Wesley. Na manima kima ya kulanda vwandaka nsungi ya Pentecote. Mpe nsungi ya Pentecote na kuvutuka ya makabu, makabu ya kimpeve. Ntangu yayi, beno tala nsungi yina ke kwisa ntangu yayi kuna na zulu na Ditadi ya yintu. Beno me mona yina mu zola kutuba? Nkwizulu ya Mfumu, kisika ya me talisama. Nzambi na bivangu nionso ke na kuingila dibuundu kumona kisika ya yawu.

³⁷ Diambu bubu yayi, mu . . . na kutala bayina nionso mu me kutana na bawu. Ba basisaka munu na kubalulaka munu, beto vwandaka baka . . . Mu fwanaka sadisa kizame ya nzutu, beno zaba, kana beto ke kwenda na bayinsi ya banzenza, beno ba-missionaire mpe bayankaka kuzaba yawu. Ntangu mu vwandaka sadisa kizame ba basisaka munu na kivinga yina kuna, Mu kunwaka . . . na yina mu banzaka na pâte, to faline, to kima mosi, mpe mu—mu kunwaka yawu. Mpe mu basikaka kuna, mu vwandaka, mu vingilaka minuti makumi tatu samu na kumona kana ya ke basika na kivumu ya munu to ve. Mu talaka na simu yina kuna, mpe ya vwandaka mwa kento mosi, ya monanaka ti yandi vwandaka pene-pene ya kufwa. Yandi vwandaka kieleka . . . mwa makulu mpe mwa maboko. Mpe mu landilaka kaka na kulutaka katuka na bakala yayi tii na bakala yina, bakala yayi tii na bakala yina, na kubelamaka pene-pene ya yandi, tii kuna mu kumaka na kisika yina ya vwandaka. Yandi monanaka mutindu muntu yina zolaka kufwa. Mpe mu belamaka pene-pene ya yandi, mu tubaka, “Lemvokila munu, mama.”

Yandi tubaka, “Mbote na nge?” Oh, yandi vwandaka ya kubela mingi!

Mpe mu tubaka, “Yinki ke tambula mbote ve?”

³⁸ Yandi tubaka, “Mu kwendaka na Tucson samu na kutala mwana ya munu ya kento. Mu belaka, ba monaka ve yina vwandaka tambula mbote ve.”

³⁹ Mu tubaka, “Kima mosi mu ke zola kuyufula nge.” Mu tubaka, “Mu ke mulongi ya Nsangu ya mbote. Nge ke Muklisto? Nge me kubama na kukwenda kana ngunga yango me lunga?”

Mpe yandi tubaka, “Mu ke mundimi ya dibuundu *kingandi*.”

⁴⁰ Mu tubaka, “Mu me yufula nge kiuvu yina ve. Nge ke Muklisto yina me fuluka na Mpeve ya Nzambi mpe yina me kubama na kukwenda ntangu Yandi ke bokila nge?” Kento yango kuzabaka ve yina mu vwandaka kutuba. Beno me mona? Oh, ya ke kiadi na kutala mutindu yinza kele!

41 Ntangu yayi, “me zabisa na beto mansweki ya luzolo ya Yandi,” nkwizulu. . . Beno bika mu tangila beno kima mosi. Mu vwandaka tanga kuna. . . Beto baka ntangu yayi “masweki ya luzolo ya Yandi.” Beto baka ba-Hebreux awa na mwa ntangu fioti, kapu 7 ya ba-Hebreux, mu ke kwikila ti ya ke mutindu yina. Mpe mu ke zola kutangila beno kima mosi yina lendaka sala beno mbote mingi ntangu beto ke banza ti beto me vwanda kintwadi na bisika ya Mazulu. Ba-Hebreux, kapu 7.

Na yina Melchisédek yayi, (Beno tala ntangu yayi.) ntinu ya Salem, nganga-Nzambi ya Nzambi ya mazulu, . . .

42 Yinki kele mansweki ntangu yayi? Mansweki yawu yayi, beno tala yawu. Nani kele Muntu yayi, “ya ke, na kuzabisa, mansweki ya luzolo ya Yandi,” Melchisédek yayi? Mu ke na kuingila bantu nionso awa, ba ke na kusosa diaka na ba-Biblia. Ba-Hebreux, kapu 7, Paul ke na kutuba, muntu yina mosi na ba-Galates.

Na yina Melchisédek yayi, ntinu ya Salem, nganga-Nzambi ya Nzambi ya mazulu, . . . kukutanaka na Abraham na ntangu ya vwandaka kuvutuka na manima kununga bantinu, mpe sakumunaka yandi;

Abraham pesaka yandi ndambu, mosi ya kumi ya bima ya yandi nionso; ntandulu ya nkumbu ya yandi, ya zola kutuba Ntinu ya ludedomo, . . . na manima ya . . . Ntinu ya Salem, (Nani kele Muntu yayi?) ya zola kutuba, Ntinu ya ngemba;

Yina ke na tata ve, mama ve, dikanda ve, yina ke na mbandukulu ya bilumbu ve, to nsuka ya luzingu ve; . . .

43 Nani kele Muntu yayi? Nani Yandi vwandaka? Yandi vwandaka na tata ata fioti ve, Yandi vwandaka na mama ata fioti ve, Yandi vwandaka na ntangu Yandi bandaka ata fioti ve, to Yandi ke vwanda ata fioti ve na ntangu ya kufwa. Yandi kutanaka na Abraham na ntangu ya vwandaka kuvutuka na manima ya kununga bantinu. Yinki yandi salaka? Yandi kwendaka sosa Lot, mpangi ya yandi ya kuzimbana, samu na kuvutula yandi. Mpe yandi kufwaka bantinu; na yina, bantinu yina kufwaka; mu ke kwikila kumi to bantinu kumi na tanu, na bimfumu ya bawu. Kasi Abraham pesaka minduku na bisadi ya yandi mpe ba kwendaka kusosa yandi, yandi kabulaka makesa ya yandi na mpimpa, beno me mona, ntangu yandi kangaka yandi na kati-kati ya mpimpa. Oh, mpangi, beto ke na kusala na kati ya mudidi na ntangu yayi, Nsemo mosi kaka beto ke na yawu kele Nsemo ya Nsangu ya mbote. Kasi yandi kabulaka makesa ya yandi, mpe kangaka yandi mpe vutulaka yandi. Mpe na ntangu ya vwandaka kuvutuka, na manima ya bitumba kumanaka!

44 Beto baka Genèse 14, na mwa ntangu fioti, samu na kutendula disolo mbote-mbote. Beto baka awa na Genèse, kumi

na yi- . . . Mu ke kwikila ya ke 14, Genèse 14. Yinga, beto baka Genèse 14:18, samu na kubanda. Beto banda fioti na ntwala ya yawu. Beto banda, yinga, na nzila ya 18, Genèse 14:18, “Mpe Melchisédek . . .” Ntangu yayi, ya ke Abraham ke na kuvutuka ntangu yayi na manima kununga bantinu. Yandi vwandaka vutuka, na ntangu yandi vwandaka vutuka, yandi vwandaka kuvutula Lot, bantu yina nionso ba tinisaka. Nionso!

⁴⁵ Mutindu David, yina kwendaka mpe bakaka . . . Yinki David kusalaka? Yandi bakaka mwa lanse, yandi kwendaka mpe botolaka mwana-dimeme yayi na yinwa ya nkosi. Beno banza na lanse mosi, samu na kukwenda kusosa mwana-dimeme. Nani na kati ya yinza lendaka sala yawu? Beno tuba na munu muntu yina na kati awa ke sala yawu, beno telemisa diboko ya beno. Mu ke tuba na beno na nswalu nionso ti beno kele na kifu. Beno me mona munu ve kutula diboko ya munu na zulu. Ve, mu lendaka landa yandi ve na makumi tatu-mpe-sambanu. Kasi yandi landaka yandi na lanse mosi, mwa kitini mosi ya mutaku ya mutindu yina, na bansinga zole na zulu ya yawu, yina ya vwandaka balula. Samu . . . Mpe ntangu ya kumaka ntangu samu na Goliath ya kutula ntembe na yandi, yandi landaka Goliath, mpe yandi tubaka, “Nzambi ya Mazulu pesaka munu muswa ya kunwanina mwana-dimeme na yinwa ya nkosi, na yinwa ya ulusu.” Yandi zabaka ti ya vwandaka lanse ve. Ya vwandaka ngolo ya Nzambi yina kwendaka kintwadi na yandi. Ya vwandaka Yandi yina vutulaka mwana-dimeme yina.

⁴⁶ Mpe yawu yina beto ke tuba bubu yayi. Nzambi ke na ba-David bisika nionso, yinga tata, yina ke na kudisa mameme ya Tata. Mpe na mwa ntangu fioti tumeur ke kwisa, to cancer ke kwisa, to kima mosi, mpe dokotolo ke sala kima mosi ve. Yina ke kangisa David yina ve, yandi ke landa mbala mosi dimeme yina, na mwa lanse, ya, “Beno lomba konso kima yina na Nkumbu ya Munu, beno ke kuzwa yawu.” Mu ke kipe ve, badokotolo lendaka kuseka, mpe bantu yankaka nionso lendaka kuseka yandi, yandi ke landa yandi kaka, samu na kuvutula dimeme yina na lupangu. Yinga, tata. “Yandi kele mwana ya Nzambi, katula diboko ya nge na zulu ya yandi!” Yandi bwisaka nkosi yina na ntoto, na manima nkosi kutelemaka, yandi kangaka yandi na mandefu mpe yandi kufwaka yandi; mwana-bakala ya ntwenia ya kulemba, yina vwandaka na kizitu pene ya makumi tatu to makumi yiya ya bakilo.

⁴⁷ Beno tala. Melchisédek, Ntinu ya Salem yina kele Ntinu ya Ngemba, na yina Salem vwandaka na simu yina ya mongo. Ntinu ya Jérusalem, Yandi vwandaka. Ya kieleka yawu yina Yandi vwandaka, Ntinu ya Jérusalem. Na yina, Jérusalem ba vwandaka bokila yawu ntete Salem, yina vwandaka ngemba; ya vwandaka ntete Jérusalem, na ntwala ba bokila yawu Jérusalem. Yandi vwandaka Ntinu ya Jérusalem. Yandi vwandaka Ntinu ya ludedomo, Ntinu ya ngemba, Ntinu ya Salem. Yandi vwandaka

na tata ve, Yandi vwandaka na mama ve, Yandi vwandaka na mbandukuu ya bilumbu ve, Yandi vwandaka na nsuka ya luzingu ve, Yandi vwandaka na dikanda ve. Oh, oh, oh! Nani kele Muntu yayi? Beno tala Yandi. Na ntangu bitumba kumanaka, na manima ya kubaka lunungu, beno tala yina Yandi tubaka. “Mpe Melchisédek,” nzila ya 18, kapu 14, ya Genèse.

Mpe Melchisédek ntinu ya Salem kunataka mampa na vinu: mpe yandi vwandaka nganga-Nzambi ya Nzambi ya mazulu.

Mpe yandi sakumunaka yandi, mpe tubaka, Vwanda ya kusakumuka Abram na Nzambi ya mazulu, mfumu ya mazulu na ntoto:

Mpe Nzambi ya mazulu kuvwanda ya kusakumuka, yina me kaba bambeni ya nge na maboko ya nge. Mpe yandi pesaka yandi mosi ya kumi ya nionso.

48 Beto tanga fioti na ntwala.

Mpe ntinu ya Sodome tubaka na Abraham, Pesa na munu bantu, mpe baka bimvwama.

Mpe Abram tubaka na ntinu ya Sodome, mu me telemisa maboko ya munu na MFUMU, Nzambi ya mazulu, mfumu ya mazulu na ntoto, (Beno kuwa mutindu yandi zengaka yawu na bunkufi, hum, mutindu ya zabisaka yandi!)

Mu ke baka ata nsinga ya nge ve to nsinga ya sapatu ya nge, mpe mu ke baka ata kima ya nge ve, ve ata kima mosi ve. . . mpe samu nge lendaka tuba, mpe yina ya nge, samu nge kutuba, mu me kumisa Abram mvwama:

Kaka yina bantwenia ya babakala me kudia, . . .

49 Beno tala Melchisédek yayi kaka na ntangu Yandi kwendaka kukutana na Abraham na ntangu yandi vwandaka kuvutuka na manima kununga bantinu. Mansweki ya Nzambi ntangu yayi ke na kumonisama pwelele! Nani Yandi vwandaka? Muntu mosi ve. . . Ba monaka ata disolo ya Yandi ve, samu Yandi vwandaka na tata ve, Yandi vwandaka na mama ve, Yandi vwandaka ata fioti ve na ntangu yina Yandi kubandaka, Yandi vwandaka ata fioti ve na ntangu Yandi ke kufwa, na yina Nani Yandi vwandaka ya ke kaka na luzingu. Yandi vwandaka na mbandukulu ata fioti ve, na yina Yandi lendaka vwanda muntu yankaka ve kasi El, Elah, Elohim; yina ke zinga na yandi mosi, yina kele na yandi mosi, Nzambi ya Ngolo nionso!

50 Yesu vwandaka na Tata, Yesu vwandaka na mama; Yesu vwandaka na mbandukulu ya bilumbu, Yesu vwandaka na nsuka ya luzingu na zulu ya ntoto. Kasi Muntu yayi vwandaka na tata to mama ve, amen, tata to mama ve. Yesu vwandaka na Tata na mama. Muntu yayi vwandaka na tata to mama ve. Amen.

Mpe yinki Yandi salaka, na manima ya bitumba kumanaka, na manima ya Abraham kubakaka kisika ya yandi?

⁵¹ Na manima ya dibuundu me baka kisika ya yawu, ba me bokila beto na lukumu ya bana, na nzila ya Mpeve-Santu. Mpe ntangu konso muntu ke baka kisika ya yandi, yina Nzambi me bokila yandi na kusala, mpe yandi ke telema ngwi tii na nsuka ya nzila, na kukwendaka kusosa bayina me zimbana.

⁵² Ntete, Paul ke katula bawu boma nionso, na yawu ntangu yayi, “Kana ba me bokila beno, kana beno me natama kaka ve na mayele ya kimuntu yina me katuka na théologie; kana beno me butuka kieleka na Mpeve, na yina Nzambi zabaka beno na mantwala na ntwala yinza kusalama, tulaka nkumbu ya beno na Buku ya Luzingu ya Mwana-dimeme, mpe ntangu yayi beto me kwisa kintwadi samu na kuvwanda na bisika ya Mazulu kati na Klisto Yesu. Bantu ya santu, yinsi ya santu, bantu ya luswaswanu, bunganga-Nzambi ya kimfumu, na kupesaka na Nzambi minkayulu ya kimpeve, ya zola kutuba, bambuma ya bikoba ya beto ke pesa lukumu na Nkumbu ya Yandi.”

⁵³ Bantu ke kwisaka awa mpe ke tuba, “Bantu yina kele bilawu.” Ya kieleka ba ke mutindu yina; ndwenga ya Nzambi kele bulawu samu na muntu, mpe ndwenga ya muntu kele bulawu samu na Nzambi. Ba me swaswana, mosi na yankaka.

⁵⁴ Kasi dibuundu ya kieleka yina me fuluka na Mpeve, yina me fuluka na ngolo ya Nzambi, yina me vwanda kintwadi na bisika ya Mazulu, ke pesa minkayulu ya kimpeve, balukumu na Nzambi, Mpeve-Santu ke sala na kati ya bawu, ke swasikisa masumu mpe ke samuna mambu ya yimbi na kati ya bawu, samu na kusungika yawu mpe kutwadisa yawu na ndonga mpe kieleka. Samu na yinki? Ntangu nionso na kati ya Mvwandulu ya Nzambi ya ke na Munkayulu yina ya menga.

⁵⁵ Beno bambuka moyo ntangu yayi, beto me zonzila yawu na suka yayi. Beno me vulukaka ve na nzila ya Menga, beno ke *bikala* ya kuvuluka na nzila ya Menga. Kasi beno me vuluka na lemvo, na nzila ya lukwikilu, na kukwikilaka Yawu. Nzambi konkotaka na ntima ya beno samu Yandi zabaka beno na mantwala. Beno talaka kuna mpe kwikilaka yawu, beno ndimaka yawu. Ntangu yayi Menga ke sala mulemvo ya masumu samu na masumu ya beno. Beno bambuka moyo, mu tubaka, “Nzambi ke fundisaka ve nsumuki samu yandi ke sumukaka.” Yandi ke nsumuki na kubanda. Yandi ke fundisaka Muklisto samu yandi ke sumukaka. Mpe samu Yandi fundisaka yandi, Klisto bakaka lufundusu ya beto. Na yawu ya ke na lufundusu ve samu na bayina kele kati na Klisto Yesu, bayina ke tambulaka ve kulandila nzutu, kasi kulandila Mpeve. Mpe kana beno me sala kima mosi ya yimbi, ya ke na luzolo ve. Beno ke sumukaka ve na luzolo. Muntu yina ke sumukaka na luzolo, ya ke basika mpe ke sumuka na luzolo, yandi me kotaka ata fioti ve na Nzutu yina

ntete. Kasi muntu yina me kotaka ntete kuna, yandi me kufwa, mpe luzingu ya yandi me bumbama kati na Nzambi, na nzila ya Klisto, ba me tula yandi kidimbu na nzila ya Mpeve-Santu, mpe diabulu lenda ve kumona yandi, yandi ke ntama mingi kuna na kati. Ya ke lomba ti yandi basika kuna na ntuala diabulu kusimba yandi. “Samu beno kele ya kufwa!”

⁵⁶ Beno tuba na muntu ya kufwa ti yandi kele muntu ya luvunu mpe beno tala yina ke salama. Beno bula yandi dikulu na bampanzi mpe beno tuba, “Nge muntu ya luvunu ya ntama, nge,” yandi ke tuba ata mpova mosi ve. Mpe ya kieleka, yandi ke vwanda kaka ya kutandama kuna.

⁵⁷ Mpe muntu yina me kufwaka kati na Klisto, beno lenda bokila yandi muntu ya luvunu, beno bokila yandi konso nkumbu yina beno me zola, yandi ke vutula mvutu ve. Kana ya ke sala kima mosi, yandi ke kwenda fioti na lweka mpe yandi ke sambila samu na beno. Ya kieleka. Kasi, oh, mingi na kati ya bawu kele mingi na luzingu. Yawu yina mu ke banzaka, beto fwana kuzika bantu ya kufwa. Bayina kele ya kufwa kati na Klisto, beto ke zikaka bawu na masa. Na bantangu mingi beto ke zikaka bantu mingi yina kele ya moyo, na musoki mingi mpe kuswana, mpe ba kele mingi na kati ya dibuundu. Kasi beto lenda ve kukabula yawu, kasi Nzambi ke sala yawu. Yandi zaba bantu ya Yandi. Yandi zaba mameme ya Yandi. Yandi zaba bandinga nionso. Yandi zaba bana ya Yandi. Yandi zaba nani Yandi lenda bokila, Yandi zaba nani Yandi zabaka na mantwala. Yandi zaba nani Yandi me pesaka bima yayi, na yina Yandi ke kukitalisa Yandi mosi. Wapi mutindu Yandi. . . Nzambi lenda tula kivuvu na bana ya Yandi, na yina ba ke sala, na kuzabaka kieleka yina ba ke sala.

⁵⁸ Beno ke kwikilaka ti Nzambi ke salaka mutindu yina? Na yina, Satana tubaka na—na Job kilumbu mosi. . . yandi tubaka na Nzambi kilumbu mosi, “Yinga, Nge ke na kisadi mosi.”

⁵⁹ Nzambi tubaka, “Ya ke na muntu mosi ve na zulu ya ntoto mutindu yandi. Yandi kele muntu ya kulunga.” Yandi tulaka kivuvu na yandi.

⁶⁰ Satana tubaka, “Oh, yinga, mambu nionso ke tambula kukondwa mpasi samu na yandi. Bika mu kuzwa yandi ntangu fioti mpe mu ke sala ti yandi kusinga Nge na kizizi ya Nge.”

⁶¹ Yandi tubaka, “Mu me pesa yandi na maboko ya nge, kasi kubaka ve luzingu ya yandi.” Beno me mona? Mpe yandi salaka nionso kasi yandi bakaka ve luzingu ya yandi.

⁶² Kasi, oh, Job, na kisika ya . . . yinki yandi salaka? Yandi singaka Nzambi ntangu Nzambi bakaka bana ya yandi, ntangu yandi salaka yandi mambu yayi nionso ya yimbi, mpe mambu nionso? Job kuyufulaka kiuvu ve. Yandi kubwaka na kizizi ya yandi mpe yandi kembilaka, alleluia, yandi tubaka, “Mfumu pesaka mpe Mfumu me kubaka, Nkumbu ya Mfumu kusakumuka!” Yawu yina.

63 Nzambi zabaka kivuvu ya Yandi kati na Job. Nzambi kuzaba wapi ntangu Yandi lenda tula kivuvu na beno. Yandi kuzaba wapi ntangu Yandi lenda tula kivuvu na munu. Kasi yina beto ke na kutula na ntangu yayi kele kutula mwana yayi na kisika.

64 Ntangu yayi, ntangu Biblia. . . Ntangu bitumba kumanaka, ntangu mambu nionso ke suka, na manima yinki diambu beto ke sala na ntwala? Yinki diambu beto ke sala na ntangu bitumba ke suka? Beno me zaba yina beto ke sala? Beto ke kutana na Melchisédek. Beto baka Mathieu 16:16, na nswalu nionso, beno tala kana ya kieleka to ve. Santu Matthieu, kapu 16 mpe nzila ya 16. Mu me ndima kieleka ti yawu yina, Matthieu 16:16. Matthieu kumi na samba- . . . Ve, ya ke kifu, ya lendaka vwanda pene-pene ve. 26:26. Oh, 16 awa, Yandi ke na kutuba na Simon Pierre; pardo, mu zolaka kutuba mutindu yina ve. 26:26, samu yina kele madia ya nsuka ya nkokila, mu ke meka na kukuma kuna. Matthieu, kapu 26 mpe nzila ya 26. Ntangu yayi beto me kuzwa yawu, beto me kuma kisika yango, na madia ya nsuka ya nkokila.

Ntangu ba vwandaka kudia, Yesu bakaka dimpa, mpe yandi sakumunaka yawu, mpe yandi bukaka yawu, mpe yandi pesaka yawu na bilandi ya Yandi, mpe yandi tubaka, Beno baka, beno kudia; yayi kele nzutu ya munu.

Mpe yandi bakaka mbungu ya vinu, mpe yandi vutulaka matondo, mpe pesaka bawu yawu, na kutubaka, Beno kunwa yawu beno nionso;

Samu yayi kele menga ya munu ya ngwisani ya malu-malu, samu yina me mwangana samu ti bantu mingi kuzwa mulemvo ya masumu (m-a-s-u-m-u, masumu, Baklisto yina ke salaka mambu ya yimbi).

65 Mbote mingi, “Kasi—kasi. . .” Beno kuwa, nzila ya 29.

. . . Mu ke zabisa beno, katuka ntangu yayi mu ke kunwa diaka ve vinu yayi tii kilumbu yina mu ke kunwa vinu ya malu-malu kintwadi na beno na kati ya kimfumu ya Tata ya munu.

66 Yinki? Diambu ya mutindu mosi Melchisédek salaka na manima Abraham bakaka kisika ya yandi. Yandi tulaka bantu ya yandi na ndonga, mpe yandi nungaka bitumba, mpe yandi vutukaka na yinzo, mpe Melchisédek kwisaka na dimpa na vinu. Na manima bitumba ke suka, na yina beto ke kudia Madia ya Makwela na Mfumu Yesu na yinza ya malu-malu. Oh, Nkumbu ya Mfumu kusakumuka. Mbote mingi.

67 “Mansweki ya luzolo ya Yandi landila bumbote ya Yandi ya mbote,” ntangu beto ke vutuka diaka na ba-Ephésien, 9, “lukanu Yandi salaka na kati ya Yandi mosi.”

Yina ke salama na ntangu yina yandi soolaka. . .

68 Mpe beno bambuka moyo ti, beto me mona yawu. Ba-Ephésien, kapu 1, nzila ya 10.

Yina ke salama na ntangu yina yandi soolaka . . .

69 Ntangu yayi, beto me longuka yina kulunga ya ntangu ke na kuvingila? Kulunga ya bantangu nionso, ntangu yina masumu ke suka, ntangu yina lufwa ke suka, ntangu yina bimbevo ke suka, ntangu yina masumu ke suka, ntangu yina kubeba nionso (bima yina ya kubeba, yina diabulu kubebisaka) ke suka, ntangu ntangu yawu mosi ke suka. Beno tala.

Yina ke salama na ntangu yina yandi soolaka na ntangu yina yandi ke vukisa kintwadi . . . mambu nionso kati na Klisto, yina kele na zulu, mpe yina kele na zulu ya ntoto; kati na yandi:

70 “Kuvukisa mambu nionso na Klisto.” Mutindu mu me tuba na suka yayi, ba-pépíte nionso beto ke kuzwa, bima yayi nionso ya nene, beno lenda siamisa yawu na Genèse, beno lenda siamisa yawu na Exode, beno lenda siamisa yawu na Lévitique, mpe na kulandilaka na yawu mutindu yina, mpe na Apocalypse ya ke suka na Yesu. Beno baka Joseph, beno baka Abraham, beno baka Isaac, beno baka Jacob, beno baka David, beno baka konso mosi ya ba-pépíte yina, bantu yina ya Nzambi, mpe beno tala kana beno ke mona Yesu Klisto ve ke kukitalisa na kati ya mosi na mosi ya bawu. “Ti Yandi ke vukisa mambu nionso kati na Mosi, Klisto Yesu.”

71 Ntangu yayi, mwa fioti na ntwala, ntangu yayi nzila ya 11.

Kati na yandi mpe beto kuzwaka difwa yina, . . .

72 Oh, “difwa mosi.” Muntu mosi fwana kubikila beno kima mosi, na kuyinga yawu. Ya kieleka? Difwa mosi! Yinki difwa beto ke na yawu? Yinki difwa beto me kuzwa? Mu me kuzwaka ata mosi ve. Kasi Nzambi bikisilaka munu difwa mosi ntangu Yandi tulaka nkumbu ya munu na Buku ya Luzingu na ntwala yinza kusalama.

73 Oh, beno ke tuba, “Ntangu yayi, vingila fioti, mpangi-bakala, Yesu salaka yawu ntangu Yandi kufwaka samu na nge.” Ve, Yandi salaka yawu ata fioti ve. Yesu kwisaka kufuta ntalu ya difwa yina samu na munu. Beno tanga nzi- . . . nzila yina me landa.

Kati na yandi mpe beto kuzwaka kieleka . . . beto kuzwaka difwa mosi, samu ti yandi zabaka beto na mantwala landila manaka ya yina ke salaka mambu nionso na mutindu ya luzolo ya yandi ya mbote:

74 Nzambi, na ntwala kusalama ya yinza, mutindu beto me mona yawu kuna na dilongi ya beto, kintwadi na beno, beto me mona mutindu Nzambi vwandaka kuzinga na yandi mosi, wapi mutindu na kati ya Yandi vwandaka zola. Na kati ya Yandi vwandaka kuvwanda Nzambi; ya vwandaka na kima

mosi ve samu na kusambila Yandi. Kati ya Yandi vwandaka kuvwanda Tata; ya vwandaka . . . Yandi vwandaka na nzila ya Yandi mosi. Na kati ya Yandi vwandaka kuvwanda Mvulusi; kima mosi ve kuzimbanaka. Na kati ya Yandi vwandaka kuvwanda Munganga. Yina ke bisalu ya Yandi. Kima mosi ve vwandaka kuna. Na yawu Mwandulu ya Yandi Mosi, luzolo ya mbote ya Yandi Mosi salaka bima yayi, na mutindu ti Yandi kuvukisa diaka na nzila ya Muntu mosi, Klisto Yesu, nionso kintwadi. Oh! “Disu me monaka yawu ve, dikutu me kuwaka yawu ve. . .” Kuyituka ve ti ya ke diambu ya mansweki!

⁷⁵ Beno tala, “yandi zabaka beto na mantwala samu na difwa yayi.” Kana mu ke kilandi ya kieleka ya kima mosi, kana Nzambi Nzambi ke na kukonkota na ntima ya munu mpe ke tuba, “William Branham, Mu bokilaka nge kubanda ntama, na ntwala yinza kusalama, samu na kulonga Nsangu ya mbote,” Mu ke na difwa mosi, difwa ya Luzingu ya Kukonda nsuka. Ntangu yayi, Nzambi fidisaka Yesu samu na kukumisa ya kieleka difwa yina samu na munu, samu ya vwandaka na kima mosi ve mu lendaka kusala samu—samu na kuyinga yawu. Ya vwandaka ya mpembe, ya vwandaka ya kusungama, ya vwandaka na kima mosi ve mu lendaka kusala. Kasi na ntangu ntangu kulungaka Nzambi fidisaka, na ntangu ya mbote ya Yandi Mosi, Yesu Mwana-dimeme, kufwaka kubanda mbandukulu ya yinza. Menga ya Yandi mwanganaka samu ti mu kuzwa difwa ya munu. Samu na kuvwanda yinki? Yinki difwa? Kisika ya mwana, samu na kuvwanda mwana ya Nzambi.

⁷⁶ Mpe ntangu yayi Yayi lendaka vwanda mpasi samu na beno. Kasi beno me zaba ti bantu yina kele bana ya Nzambi kele banzambi ya fioti? Bantu yikwa me zaba yawu? Bantu yikwa me zaba ti Yesu tubaka mutindu yina? Biblia, Yesu tubaka, “Musiku me tuba ve ti, yawu mosi, ti beno kele ‘banzambi’? Mpe kana beno ke bokilaka banzambi. . .” Na yina, Nzambi me tuba na Genèse 2 ti ba vwandaka banzambi, samu ba vwandaka, samu bawu vwandaka na luyalu na zulu ya bimfumu ya yinza. Yandi pesaka yandi luyalu na zulu ya bima nionso. Mpe yandi zimbisaka kisika ya yandi ya nzambi, yandi zimbisaka kisika ya yandi ya mwana, yandi zimbisaka kimfumu ya yandi, mpe Satana bakaka luyalu. Kasi, mpangi, beto ke na kuingila bakumonisama ya bana ya Nzambi yina ke vutuka mpe ke baka diaka luyalu. Beto ke na kuingila kulunga ya ntangu, ntangu pyramide ke kuma na nsongi, ntangu bana ya Nzambi ke monisama pwelele, ntangu ngolo ya Nzambi ke kwenda na ntwala (alleluia) mpe ke botula ngolo nionso yina Satana ke na yawu. Yinga, tata, ya ke ya yandi.

⁷⁷ Yandi kele Logos yina basikaka na Nzambi, ya kieleka, yina vwandaka Mwana ya Nzambi. Na yina Yandi salaka muntu nzambi yina ya fioti. Mpe Yandi tubaka, “Kana ba ke bokilaka bayina na nzila ya bawu Ndinga ya Nzambi kwisaka, baprofete, kana ba ke bokilaka bawu ‘banzambi’ bayina na nzila ya bawu

Ndinga ya Nzambi kwisaka . . .” Mpe Nzambi tubaka mutindu yina, Yandi mosi, ti ba vwandaka banzambi. Yandi tubaka na Moise, “Mu me sala nge nzambi, mpe Aaron profete ya nge.” Amen. Fiou! Mu ke sala mbala yankaka mutindu musambidi mosi ya fanatiki, kasi mu ke mutindu yina ve. Oh, kana meso ya beno lendaka kuzibuka samu na kumona mambu yina. Mbote mingi. Yandi salaka muntu nzambi, nzambi na kati ya kimfumu ya yandi. Mpe kimfumu ya yandi ke kwenda katuka na mubu mosi na mubu yankaka, katuka lweka ya mubu na lweka ya mubu yankaka; yandi ke na luyalu ya yawu.

⁷⁸ Mpe ntangu Yesu kwisaka, na kuvwandaka Nzambi Mosi kukondwa disumu, Yandi siamisaka yawu. Ntangu kitembo kubulaka, Yandi tubaka, “Ngemba, vwanda swi!” Amen. Mpe na yinti kuna, Yandi tubaka, “Muntu mosi ve ke kudia diaka mbuma ya nge.”

⁷⁹ “Ya kieleka, Mu ke tuba na beno, beno kele banzambi ya fioti, kana beno tuba na mongo yayi, ‘Katuka awa,’ mpe beno tula ntembe ve na kati ya ntima ya beno, kasi beno kwikila ti yina beno me tuba ke salama, beno lenda kuzwa yina beno me tuba.”

⁸⁰ Beno vutuka na Genèse, na kisina, yinki yawu kele? Ntangu yayi yinza mpe bivangu ke na kuvumuna, ke na kuboka, bima nionso ke na kidi-kidi. Yinki? Samu na kumonisama ya bana ya Nzambi, ntangu bana ya kieleka, bana yina me butuka, bana yina ke ya kifuluka ke tuba mpe ndinga ya bawu me ndimama. Mu ke kwikila ti beto me kuma pene-pene ya yawu na ntangu yayi. Yinga, tata. Kutuba na mongo yayi, bika ya vwanda mutindu yina.

⁸¹ “Mpangi-bakala, mu—mu ke na nsatu ya kima *kingandi*, ti kima mosi kusalama. Mu ke mukwikidi kati na Klisto Yesu.”

⁸² “Mu ke pesa yawu na nge na Nkumbu ya Mfumu Yesu Klisto.” Amen. Tala kumonisama.

⁸³ “Oh, mpangi-bakala, bimenina ya munu ke na kuzika kuna. Mu me kuzwa mvula ve.”

⁸⁴ “Mu ke tinda nge mvula, na Nkumbu ya Mfumu.” Yawu yina ke kwisa. Oh, ke na kuingila, ke na kuvumuna, bivangu nionso ke na kuingila bakumonisama ya bana ya Nzambi. Nzambi tumaka yawu na mbandukulu. Yandi pesaka muntu kimfumu.

⁸⁵ Yandi pesaka Yesu Klisto mpe Yesu pesaka yawu kati na Nkumbu ya Yandi, na kivuvu, “Beni lombi konso kima yina na Tata na Nkumbu ya Munu mpe Mu ke sala yawu.” Oh, Mpangi Palmer! Na kuingilaka bakumonisama ya bana ya Nzambi, kisika, Dibuundu!

⁸⁶ Mutindu mu tubaka, Buku ya ba-Ephésien kele Buku ya Josué, mpe Josué ke na kutula bantu kisika ya bawu. Ntangu yayi, kana ba lendaka ve kuvwanda swi, mpe yandi tulaka

Ephraïm awa, mpe kuna ntoto ya Manassé, mpe *yayi* kuvutuka ya kudasuka mpe na nganzi, yinki mutindu ba ke wisana? Ntangu muntu mosi ke tuba, “Mu ke Baptiste, mu ke Methodiste, mu ke Pentecotiste, mu ke Unitaire, mu ke Binitaire, mu ke *Kingandi*.”

⁸⁷ Yinki mutindu beno ke sala yawu? Beno vwanda swi! Nzambi ke zola kutula Dibuundu ya Yandi na kisika, bana-babakala na bana-bakento ya Nzambi. Nzambi, bika mu zinga mingi samu na kumona yawu, ya ke kisambu ya munu. Ya me kuma pene-pene mingi ti mu lendaka kusimba yawu na maboko ya munu, mutindu yina. Ya me kuma pene-pene. Yawu yina mu ke vingilaka ntangu nionso na kumona, mu ke vingila na kumona ntangu yina beto ke tambula na bala-bala; kumona muntu mosi ya kutandama kuna, kikata kubanda lubutuku ya yandi, “Mu ke na mbongo mpe wolo ve.” Oh, na kuingilaka bakumonisama ya bana ya Nzambi, alleluia, ntangu Nzambi ke kukitalisa Yandi mosi pwelele, ntangu ba ke manisa bimbevo, ba ke manisa cancer, ba ke manisa bimbevo.

⁸⁸ Beno ke banza ti cancer kele kima? Biblia me tuba ti ntangu mosi ke kwisa ntangu bantu ke pola ya kutelema, mpe ba-buse ke kudia banzutu ya bawu na ntwala bawu kufwa. Cancer kele mpasi ya meno yina ke kwisa. Kasi, beno bambuka moyo, ba me pekisa na kilumbu yina na diambu yina ya mpasi na kusimba bayina vwandaka na Kidimbu ya Nzambi. Yawu yina beto ke sala kingolo-ngolo ntangu yayi, kukota mpe kubaka kisika na kati ya Kimfumu ya Nzambi na ntwala mambu yayi ya mpasi kukwisa. Oh, ya ke mbote! Nsungi ya ntangu, kulunga ya ntangu, difwa.

Kati na yandi mpe beto . . . beto kuzwaka . . . difwa, na mutindu yandi zabaka na mantwala . . .

⁸⁹ Wapi mutindu ba pesaka beto difwa, na nzila ya yinki? Prédestination. Prédestination kele luzabu ya mantwala. Wapi mutindu Nzambi zabaka ti Yandi lendaka tula kivuvu na beno samu na kuvwanda mulongi? Luzabu ya Yandi ya mantwala. “Ya me tala ve yina me zola to yandi yina ke baka mbangu, to yandi . . . Ya ke mawa ya Nzambi.” Ya kieleka, prédestination. Yandi zabaka yina vwandaka na kati ya beno. Yandi zabaka yina vwandaka na kati ya beno ata mpe na ntwala beno kwisa na zulu ya ntoto. Yandi zabaka yina vwandaka na kati ya beno na ntwala ntoto kuvwanda samu beno kwisa kuvwanda na zulu ya yawu. Ya kele—ya kele Yandi. Ya ke Nzambi ya seko, yina kele ya seko. Beto kele na nsuka, beto lenda banza kaka na nsuka.

⁹⁰ Ya vwandaka na ntalu mingi samu na munu, kubanda yina salaminaka munu. Mu zaba ve. Ntangu mu ke banza na yawu, ntangu mu telemaka kuna na mwa bantangu fioti ya kiese, mpe mu banzaka, “Ya ke na mbasi ve.” Ya vwandaka na mazono ve, ya vwandaka na kimbevo ve, ya vwandaka na kiadi ve. Ya ke

na mwa kiese fioti ve, na manima kiese ya mingi; ya ke kaka na kiese. Oh, la la! Oh, ntangu mu telemaka kuna mpe mu tubaka, “Yinki yayi?”

91 Ndinga mosi tubaka, “Yayi kele zola ya kulunga, mpe bayina nionso nge zolaka mpe bayina nionso zolaka nge kele awa na nge na ntangu yayi.”

92 “Mpe nge ke talisa beto na Mfumu Yesu ntangu Yandi ke kwisa, mutindu ba-trophée ya ministere ya nge.” Mu monaka bakento yina ya kitoko ya kutelema kuna, bawu nionso vwandaka yambama munu mpe kuboka, “Mpangi ya beto ya ntalu, mpangi ya luzolo!” Mu monaka babakala yina na bansuki ya kubenda na manima awa, ke kwisa mbangu, ke yamba munu mpe ke tuba, “Mpangi ya beto ya luzolo!”

Mpe mu banzaka, “Yinki yayi zola kutuba?”

Yandi tubaka, “Ba ke bantu ya nge.”

93 Mu tubaka, “Bantu ya munu? Ya lendaka vwanda ve na ba-Branham mingi, ya ke na ba-million.”

94 Yandi tubaka, “Ba ke bandimi ya nge!” Alleluia. “Ba ke bandimi ya nge. Ba ke bayina . . .” Yandi tubaka, “Nge ke mona yina me telema kuna?” Kento ya kitoko mingi mu me monaka ntete ve. Yandi tubaka, “Yandi vwandaka na bamvula makumi yivwa ntangu nge twadisaka yandi na Nzambi. Kuyituka ve yandi ke na kuboka, ‘Mpangi ya munu ya luzolo.’” Yandi tubaka, “Yandi ke vwanda diaka kiboba ata fioti ve. Ya me lutaka samu na yandi. Yandi ke na kati ya buntwenia. Yandi kele awa. Yandi lenda ve kunwa masa ya madidi, yandi ke na nsatu ya yawu ve. Yandi lenda tandama ve samu na kulala, samu yandi ke lemba ve. Ya ke na mbasi ve, mazono ve, kima mosi ve. Beto ke na kati ya Seko ntangu yayi. Kasi kilumbu mosi ya nkembo Mwana ya Nzambi ke kwisa, mpe nge ke sambisama landila Ndinga yina nge longaka bawu.” Oh, mpangi!

Mu tubaka, “Paul fwana nata ngonga ya yandi?”

“Yinga, tata.”

95 Mu tubaka, “Mu longaka Yawu kieleka mutindu Paul zabisaka Yawu. Mu kwendaka na lweka ata fioti ve, mu me ndimaka ata fioti ve ba-credo ya dibuundu mosi to kima mosi ve. Mu me bikala mutindu mosi.”

96 Mpe bawu nionso kubokaka kintwadi, “Beto zaba yawu! Beto me pema na kivuvu.” Bawu tubaka, “Nge ke talisa beto na Yandi, na manima beto ke vutuka diaka na ntoto, samu na kuzinga mvula na mvula.” Oh, la la!

97 Na ntangu yina mu bandaka na kuvutuka. Mu talaka, mu vwandaka ya kulala kuna na zulu ya mbeto, mpe mu monaka nzutu ya munu ya ntama awa ke na kununa mpe na lusinunu, ya kubeba na—na bimbevo mpe bampasi, mpe mu monaka maboko

ya munu na manima ya yintu ya munu, mpe mu banzaka, “Oh, mu ke vutuka diaka na kima yina?”

⁹⁸ Mpe mu landilaka na kuwa Ndinga yina, “Landila kaka na kukwenda na ntwala! Landila kaka na kukwenda na ntwala!”

⁹⁹ Mu tubaka, “Mfumumu, mu ke kwikilaka ntangu nionso na kubeluka ya Kinzambi, mu ke landila kaka kukwikila yawu. Kasi mu ke sala kikesa na samu na mioyo yina, na yawu sadisa munu. Mu ke kotisa mingi kuna mu ke . . .Bika mu zinga mingi, Mfumumu, mpe mu ke kotisa ba-million yankaka kuna, kana Nge ke bika munu kuzinga.”

¹⁰⁰ Ntinta ya bawu, credo ya bawu, yinsi ya bawu, yina bawu kele mu ke kipe yawu ve, bawu nionso kele mosi ntangu ba ke kuma kuna, mpe bibaka yina ya bandilu me lutaka. Oh, mu lenda mona bakento yina, kitoko mingi; yina mu me monaka ata fioti ve . . .ya vwandaka kulumuka, bansuki ya yinda vwandaka kukulumuka na mukongo ya bawu. Ba-jupe ya yinda. Ba vwandaka makulu mwasi. Mu monaka babakala yina na bansuki ya kubenda na dikosi ya bawu, bansuki ya mbwaki, bansuki ya ndombe, mpe bantinta ya luswaswanu. Mpe ba vwandaka dumuka ke yamba munu. Mu lendaka simba bawu. Mu simbaka maboko ya bawu. Nzambi kele Zuzi ya munu, mpe Buku yayi ya santu kele ya kuzibula. Mu lendaka simba bawu kaka mutindu mu ke simba kizizi ya munu na maboko ya munu. Ba vwandaka dumuka ke yamba munu, ata mpusa ya nzutu vwandaka ve mutindu ya lendaka vwanda na ntangu yayi. Mu ke kipe ve wapi mutindu beno kele ya santu, nani beno kele, wapi mutindu ya mulongi beno kele, ngangang-Nzambi to nionso yina beno lendaka vwanda, muntu mosi ve lendaka bika kento mosi kuyamba yandi, kukondwa kuvwanda na bampusa ya nzutu. Yina kele ya kieleka mpenza. Kasi, mpangi, ntangu beno ke luta kati-kati ya awa na kuna, ya ke vwanda mutindu yina ve kuna. Oh, la la! Ya ke . . . Oh, ya ke . . .Ya lenda salama ve. Ya ke zola. Bima nionso kele kieleka mpangi mpe bima nionso kele kieleka mpangi-kento. Ya ke na lufwa ve, kiadi ve, kimpala ve, kima mosi ve, kima mosi ve lenda kota kuna. Ya ke kaka ya kulunga. Yawu yina mu ke meka na kusala kingolo-ngolo. Yawu yina kisika mu ke zola kukuma.

¹⁰¹ Mu tubaka, “O Mfumumu, yawu yina mu kele awa na yinzo-Nzambi, mu ke na kumeka na kutula dibuundu na ndonga.” Samu na kutuba na beno, mpangi-bakala na mpangi-kento, ya ke na kima mosi kaka lenda kota kuna, ya ke zola ya kulunga. Ya kele ve samu beno kele ya kukwikama na Branham Tabernacle, to na dibuundu ya ba-Methodiste to na dibuundu ya ba-Baptiste. Yina ke mbote mingi, beno fwana vwanda mutindu yina. Kasi, oh, bankundi ya munu, beno fwana . . .Ya kele ve samu beno me tuba bandinga ya malu-malu, beno binaka kati na Mpeve, samu beno basisaka bampeve ya yimbi to katulaka miongo na lukwikilu. Nionso yina kele mbote mingi, na yina ya ke mbote mingi, kasi ya ke kaka kuvwanda na zola yina ya kieleka

ya kulunga kuna na kati. Ya ke kisika yina zola ya kulunga vwanaka. Mpe ya ke kaka kima yina ke kotisa beno kuna. Ya ke kaka kima yina lenda vwanaka kuna, ya ke kaka kima yina vwanaka kuna, kuna. Oh, la la! Ya ke lukumu ya bana. Nzambi, na ntwala ya mbandukulu ya yinza.

¹⁰² Ntangu yayi, beto sala nswalu, beto baka kapu yayi mosi, na mutindu nionso, kana ya lenda salama, na minuti kumi na ntwala.

Na yandi diaka beto me kuzwa difwa... (Beto ke yinga yinki? Luzingu ya Kukonda nsuka...)...na mutindu ya zabaka beto mantwala... .

Wapi mutindu? Bantu nionso me bakula yawu? Ya ke beno bantu bokilaka Nzambi? Ve, Nzambi bokilaka beno. Bantu yankaka ke tubaka, “Oh, mu sosaka Nzambi, mpe sosaka Nzambi.”

Beno salaka yawu ve. Muntu mosi sosaka Nzambi. Ya ke Nzambi sosaka muntu. Yesu tubaka, “Muntu mosi ve lenda kwisa na Munu kana Tata ya Munu me bokila yandi ntete ve.” Beno me mona, ya ke nkadulu ya muntu na kutina Nzambi. Mpe beno ke tubaka ntangu yayi. . .

¹⁰³ Yina, yawu yina ke yangisaka munu, ti, kulonga beno bantu; beno landila ve na kuvwanda mutindu yina beno vwanaka ntete, beno soba na ntangu yayi! Beno kuwa mutindu mu ke tuba yawu, MUTINDU ME TUBA MFUMU. Ya ke munu ata fioti ve ke kukibokila mutindu yayi, mu ke mosi ve. Kasi beno ke bokilaka munu profete ya beno, to profete. Yinza ke kwikilaka yawu, yinza ya muvimba, ba-million na ba-million na ba-million ya bantu. Mu me tuba mbala mosi mpe na mutindu yankaka na kumi to—kumi to ba-million makumi zole ya bantu, to kulutila yina, me tuba na ntwala ya bawu. Mu me mona makumi ya mafunda ya ba-vision na bidimbu mpe bimangu, mpe mosi ve na kati ya yawu me salamaka ve. Mpe ya kieleka. Yandi me zabisaka munu na ntwala mambu yina me kubwaka ata fioti ve kasi yina me salamaka kaka mutindu yina. Mu ke tula ntembe na muntu nionso samu na yawu. Ya kieleka. Mu ke tuba ve ti mu ke profete, kasi beno kuwa munu.

¹⁰⁴ MUTINDU ME TUBA MFUMU, ya ke lomba zola ya kulunga samu beno kota na kisika yina, samu yawu yina kaka vwanaka kuna. Ya ke tala mbongo ve, ntalu ya mambu ya nene ya nsambulu, mambu ya mbote yikwa beno salaka to nionso yina beno salaka, yina ke vwanaka na mfunu ve kilumbu yina. Ya ke lomba zola ya kulunga. Na yawu nionso yina beno ke sala, beno tula nionso yankaka na lweka tii kuna beno ke vwanaka ya kufuluka na zola ya Nzambi tii kuna beno lenda zola bayina ke yinaka beno.

¹⁰⁵ Mu ke kaka mutindu mu me tuba yawu na suka yayi, mu me salamaka, nkadulu ya munu ya muvimba kele lemvo. Bantu

mingi ke tubaka, “Ntangu yayi, kwanza munu na mukongo mpe mu ke kwanza nge mpe. Yinga, beno ke sala kima mosi samu na munu mpe mu ke sala kima mosi samu na beno.” Yina ke lemvo ve. Lemvo kele, kana mukongo ya nge ke na mukusa, mu ke kwanza nge kaka, ata ti nge me kwanza munu to ve; beno bula munu mbata na kizizi, mpe beno tuba “mu ke na mukusa na mukongo, to, mu zola ti nge kwanza munu,” mu ke kwanza beno. Beno me mona? Yawu yina, beno sala kima mosi. Mu ke kwikilaka ve na bisalu. Mu ke kwikilaka ti bisalu kele zola. Bisalu ke—bisalu ke talisa ti lemvo me baka kisika. Mu ke ya kwikama ve na kento ya munu samu mu kwikila ti yandi ke kufwa makwela na munu kana mu me sala yawu, mu ke vwanda ya kwikama na yandi samu mu ke zolaka yandi.

¹⁰⁶ Mu ke longaka Nsangu ya mbote ve samu mu ke banza ti mu ke kwenda na difelo kana mu me sala yawu ve, mu ke longaka Nsangu ya mbote samu mu ke zolaka Yandi. Ya kieleka. Beno ke banza ti mu ke zabuka banzadi ya bitembo, mpe bavion yina ke kulumuka mpe ke mata, mpe bansemo ke sema bisika nionso, mpe—mpe bima yankaka, mpe na muniti mosi to yankaka. . . mpe bantu nionso ke na kuboka, mpe ba “Mbote na nge Maria” ke na kuwakana bisika nionso na avion, mpe bima nionso? Bantu ke ningana-ningana na mikaba ya bawu, mpe pilote ke tuba, “Beto me bikala kaka na essence fioti samu na kusimba diaka minuti kumi na tanu tii na nsuka, mu zaba ve kisika beto kele.” Beno banza ti mu ke sala yawu kaka—kaka samu na kiesa ya kusala yawu? Huh! Beno banza ti mu ke kwenda kuna na kati ya bamfinda kisika basoda ya ba-Allemand lendaka tula maboko ya bawu nziunga-nziunga ya munu mutindu *yayi* na bankokila nionso samu na kukotisa munu mpe kubasisa munu na lukutakanu, tii kuna Mpeve-Santu ke banda na kusala bimangu? Ba-communiste vwanda kutala munu na ba-telescope ya mpimpa, samu na kubula munu munduki na kilomètre mosi na ndambu. Beno banza ti mu ke sala yawu kaka samu na kiesa ya kusala yawu? Samu kima mosi na kati ya munu ke zolaka; ba ke bantu yina Klisto kufwaka. Paul tubaka, “Mu ke zola kaka ve kukwenda na Jérusalem, kasi mu ke kwenda kuna samu na kukomama na kulunsi. Mu ke kwenda samu na kufwa. Mu ke kwenda kuna samu na diambu ya Mfumu.” Ya ke kima mosi, ya ke zola yina tindika beno, yina ke pusa beno. Ya ke ya kieleka.

¹⁰⁷ Kana mu longaka Nsangu ya mbote samu na mbongo, kana ya vwandaka mutindu yina, mu lendaka vwanda ve na mfuka ya makumi zole ya ba-dollars na nkokila yayi, mu lendaka vwanda na mfuka yina ve. Ve, tata. Samu mu zolaka bumba ndambu ya—ndambu ya ba-million yina ba pesaka munu. Muntu mosi, muntu mosi tindaka bisadi ya F.B.I. na mukanda ya banke ya million mosi na mafunda nkama tanu ya ba-dollar. Mpe mu tubaka, “Benovutula yawu.” Ya ke samu na mbongo ve! Ya ke mbongo

ve. Mu ke longaka ve Nsangu ya mbote samu na mbongo. Ya ke samu na yawu ve!

108 Ya ke samu na zola. Kima mu ke zola kusala, kele, ntangu mu ke kuma na simu yina kuna ya pema ya munu ya nsuka, yina lendaka vwanda na minuti tanu ke kwisa, ya lendaka vwanda na bangunga zole ke kwisa, ya lendaka vwanda na bamvula makumi tanu ke kwisa, mu zaba ve ntangu ya ke vwanda. Kasi ntangu ya ke salama, ntangu mu ke kuma kuna, mu ke mona beno na kitoko mingi ya buntwenia, kukwisa mbangu, na kubokaka, “Mpangi ya munu ya luzolo! Mpangi ya munu!” Yawu yina ke na kati ya ntima ya munu. Kikuma yawu yina. Mu ke meka ve kuswaswana na beno samu na kuvwanda—kuvwanda luswaswanu, kasi mu ke na kumeka kutula beno na nzila ya kieleka. Ya ke mutindu yina ba ke kotaka kuna. Dibuundu ya beno ve, denomination ya beno ve, kasi lubutuku ya beno kati na Klisto. Oh, la la. Fiou!

Kati na yandi . . . beto kuzwaka . . . difwa mosi, samu ti yandi zabaka beto na mantwala landila manaka ya yandi ke salaka mambu nionso na mutindu ya luzolo ya yandi mosi:

109 Beno kuwa. Beto ke sukisa na mwa minuti fioti. Beno kuwa na bukebi nionso ntangu yayi na ntwala beto sukisa.

Samu ti beto kuvwanda samu na balukumu ya nkembo ya yandi, beto yina tulaka ntete kivuvu na . . . Klisto.

Kati na yandi beno mpe tulaka kivuvu, . . .

110 Beno tala yayi ntangu yayi, na bukebi nionso. Beno lwata kazaka ya beno, kazaka ya Nsangu ya mbote. Beno zibula makutu ya beno, beno kuwa na bukebi nionso. Mu ke na nzila ya 13.

Kati na yandi beno mpe tulaka kivuvu, na manima ya kuwa . . .

“Lukwikilu ke kwisaka na . . .” [Dibuundu me tuba, “Na mambu yina beto ke kuwaka.”—Mu.] “na mambu yina beto ke kuwaka . . .” [“Ndinga.”] “Ndinga ya . . .” [“Nzambi.”]

. . . na manima ya beno me kuwa ndinga ya kieleka, . . .

111 Yinki kele Kieleka? Ndinga ya Nzambi. Ya kieleka? Jean 17:17, beno yina ke na kusonika Masonuku, Yesu tubaka, “Santisa bawu, Tata, na nzila ya Kieleka. Ndinga ya Nge kele Kieleka.”

. . . na manima beno me kuwa kieleka, nsangu ya mbote ya mpulusu ya beno: . . .

112 Yinki mpulusu yandi vwandaka meka na kutuba na bawu? Ba zabaka bawu na mantwala na ntwala ya mbandukulu ya ntoto (Ya kieleka?), samu na lukumu ya bana, ba zabaka bawu na mantwala samu na Luzingu ya Kukonda nsuka. Ntangu yayi,

na manima beno me kota na Luzingu ya Kukonda nsuka, na manima ya beno me vuluka, me santisama, me fuluka na Mpeve-Santu, beno kele bana. Ntangu yayi Nzambi ke zola kutula beno na kisika ya beno, oh, na mutindu ti beno lendaka sala kisalu samu na Kimfumu ya Yandi mpe nkembo ya Yandi.

¹¹³ Yawu yina Nsangu ya mbote. Ya zola kutuba, ntete, kuwa Ndinga, “Benó balula bantima ya beno, mpe beno baka mbotika na Nkumbu ya Yesu Klisto samu na mulemvo ya masumu.” Kukatula masumu ya beno nionso, kubokila Nkumbu ya Mfumu Yesu Klisto, samu na Yinsi ya nsilulu. Nsilulu kele samu na bizieti nionso yina kele na nzila. Kana beno me bika yinzo na nkokila yayi, nsumuki, na kutubaka, “Mu ke kwenda kuna na Branham Tabernacle,” Nzambi me pesa beno ntangu ya mbote na nkokila yayi. Ya ke na kima mosi kati-kati ya beno na Yinsi ya nsilulu. Yinki kele Yinsi ya nsilulu? Mpeve-Santu. Yina vwandaka kati-kati ya Josué na yinsi ya nsilulu vwandaka Jourdain. Yina kele kieleka.

¹¹⁴ Moise, na kuvwandaka kifwani ya Klisto, yandi kotisaka bana na yinsi ya nsilulu, kasi Moise kotisaka ve bana na yinsi ya nsilulu. Josué kotisaka bawu mpe kabulaka ntoto. Yesu futaka ntalu, twadisaka bawu tii na Mpeve-Santu. Nzambi fidisaka Mpeve-Santu mpe Yandi tulaka dibuundu na ndonga, konso muntu, na kufulusaka yandi na Mwandulu ya Yandi Mosi. Benó me mona yinki mu zola kutuba? Nionso kati na Klisto Yesu, wapi mutindu Nzambi zabaka yayi na mantwala lubokilu ya Nsangu ya mbote yayi!

¹¹⁵ Paul, ba-Galates 1:8, me tuba, “Kana Wanzio mosi me kwisa kulonga beno kima yankaka, yandi vwanda ya kusingama.” Kieleka, Nsangu ya mbote. Ntangu yayi beno kuwa na bukebi nionso mutindu beto ke landila na kutanga, mutindu beto ke sukisa nzila ya kutanga.

. . . nsangu ya mbote ya mpulusu ya beno: kati na yandi mpe . . . (Benó kuwa na bukebi.) . . . na manima ti beno kwikilaka, ba me tula beno kidimbu na Mpeve-Santu ya nsilulu,

¹¹⁶ Na bilumbu ya nsuka, Biblia me tuba, beno tala ntangu yayi, na bilumbu ya nsuka ya ke vwanda na mitindu zole ya bantu. Mosi ya bawu ke vwanda na Kidimbu ya Nzambi, yina yankaka ke vwanda na kidimbu ya niama. Ya kieleka? Bantu yikwa kuzaba yawu? Mbote, kana Kidimbu ya Nzambi kele Kidimbu ya . . . Kana Kidimbu ya Nzambi kele Mpeve-Santu, na yawu kukondwa Mpeve-Santu kele kidimbu ya niama. Mpe Biblia me tuba ti bampeve yina zole ke vwanda pene-pene mingi ti ya ke vuna yina Soolamaka kana ya lendaka kusalama. Ya ke salama ata fioti ve, samu ba soolaka bawu samu na Luzingu ya Kukonda nsuka. Benó me mona?

117 Dibuundu, mutindu beto me zaba yawu bamwense kumi kwendaka kukutana na Mfumu, bawu nionso ya kusantisama, bawu nionso vwandaka ya busantu, bawu nionso vwandaka ya kusantisama. Tanu vwandaka na nsukinina mpe bikaka minda ya bawu ya kufwa. Tanu vwandaka na mafuta na minda ya bawu. “Mpe, beno tala Bakala ya makwela!” Mpe tanu yina vwandaka na mafuta na minda ya bawu kotaka na Mukembu ya Makwela. Mpe bayankaka bikalaka na nganda kisika vwandaka kudila mpe kuboka na nkwetisa meno. Beno vwanwa ya kukubama, samu beno zaba ve yinki muniti Mfumu ke kwisa. Beno vwanwa na . . . Yinki mafuta ke talisa na kati ya Biblia? Mpeve-Santu.

118 Ntangu yayi samu na beno bubu yayi, beno bampangi ba-Adventiste du Septième jour yina ke tubaka ti kilumbu ya sambwadi kele Kidimbu ya Nzambi, beno natila munu Masonuku samu na kusiamisa yawu. Biblia me tuba ti Kidimbu ya Nzambi kele Mpeve-Santu. Beno tala yayi. “Yina . . .” Beno tala nzila ya 13 ntangu yayi.

. . . na manima beno me kwikila, ba me tula beno kidimbu ya—ya Mpeve-santu ya nsilulu.

119 Beno baka ba-Ephésien 4:30, mu ke kwikila ti yawu yina. Beno tala kana beto me baka ve kapu 4:30, beno tala kana yayi ke mutindu mosi ve. Ba-Ephésien, kapu 4 mpe nzila ya 30. Yinga, yawu yayi, 4:30.

Mpe beno monisa kiadi ve na Mpeve-Santu ya Nzambi, yina ba tulaka beno mutindu kidimbu tii na kilumbu ya mpulusu.

120 Bantangu yikwa? Ntangu kieleka, kieleka beno me kuzwa Mpeve-Santu, bantangu yikwa Yawu ke vwanwa? Tii na reveil yina ke kwisa, tii kuna nkooko ya kento ke kanga beno nzila, tii kuna mfumu ya beno ya kisalu ke nganina beno? Tii na kilumbu ya mpulusu ya beno! Alleluia!

121 Na manima beno me kufwa, na manima beno me kota na Yinsi yina, ntangu beno kele kuna na bankundi ya beno ya luzolo, beno kele ya kufulukana na Mpeve-Santu. Masonuku! Beno kele kaka mutindu beno kele na ntangu yayi, kaka beno ke . . . beno me kota na nzutu yankaka. Beno me soba kaka bayinzo. Yayi kumaka ya ntama mingi, beno lendaka diaka ve kutula bardeau na zulu ya yawu, ba-chevron vwanwa ya kupola. Ya kieleka. Na yawu beno me yambula kaka yina ya ntama mpe beno me bika yawu kupola, mpe beno me kota na yina ya malumu. Ya kieleka? “Kana tenta yayi beto ke na kuzingila me kubeba, beto ke na mosi yina ke na kuingila beto.”

122 Beno ke bambuka moyo kilumbu yina, beto tubilaka yawu? Ntangu bébé ya fioti me salama na kati ya kivumu ya mama, mpe mwa misisa ya fioti ke na kuingila mpe ke na dumuka mpe nionso yina. Kasi kaka na ntangu mama ke basisa bébé yina mpe bébé ke kwisa na zulu ya ntoto, kima ya ntete, nzutu ya kimpeve

ke kanga mwa nzutu yina ya kimuntu. Mu banza ti dokotolo ke pesa yandi . . . [Mpangi Branham me bula maboko ya yandi—Mu.] mutindu *yayi*, to kima mosi samu na kuningisa yandi, mpe “wa, wa, wa!” Mpe na mbala mosi ya ke kwenda na dibebe ya mama, “um, um, um,” ya ke ningisa yintu ya yandi na zulu mpe na nsi na dibebe ya mama, samu na kumatisa miliki na misisa ya miliki.

¹²³ Mwana ya ngombe ya fioti, kaka na ntangu ya ke basika na mama ya yandi, ya ke telema na zulu ya mabolongo ya yandi na manima ya mwa minuti fioti. Yinki ya ke sala? Ya ke kwenda mbala mosi kuna, ya ke kangama na mama ya yandi, mpe ya ke banda na kuningisa mwa yintu ya yandi ya fioti na zulu mpe na nsi mutindu yina, samu na kubaka miliki ya yandi. Alleluia! Yinga, tata.

¹²⁴ Ntangu nzutu yayi ya kimuntu ke kwisa, ya ke na nzutu ya kimpeve ke na kuingila yawu.

¹²⁵ Mpe ntangu nzutu yayi ya kimuntu ba me tula yawu na ntoto, alleluia, ya ke na mosi ke na kuingila kuna! Beto ke lutaka kaka na mosi na yankaka, beto ke sobaka bisika ya beto ya kuzinga. Nzutu yayi ya lufwa ke lwata yina ke kufwaka ve, yayi ya kimpeve; yayi ya kubeba ke lwata yina ke bebaka ve. Nzutu yayi ya ntama ya balusinunu, ya kubeba, ya kufumbama, kasi ya ke soba ve na nionso mutindu ya yawu ya nganda, mu zola kutuba ntangu ya ke kuma kuna, beno ke vwanda kaka na mpeve yina mosi.

¹²⁶ Beno bika mu pesa beno mwa kima yina ke yangisa beno, kasi ya ke Biblia, na manima mu ke pesa beno yina ke semisa yawu samu na beno. Beno tala mbote yayi. Ntangu Saül ya kiboba, ntinu, kiboba, na ntangu ya vwandaka na kiboba ya mulongi ya nene ya denomination kuna, beno zaba, yina lutaka bawu nionso na yinda, mpe ba vwandaka na boma, ba zabaka kima mosi ve samu na yina ya Mazulu. Ya lombaka ti David kukwisa samu na kuvulusa mwana-dimeme na yinwa ya nkosi, yandi kufwaka Goliath. Beno tala yandi. Yandi kwendaka ntama mingi na Nzambi, yandi vwandaka kuyina mulongi yayi ya exalté. Mpe na kisika ya kuvwanda samu na yandi, samu na kumeka kusadisa yandi, yandi teleminaka yandi. Yina ke kifwani ya kieleka ya yina ke na kusalama, kifwani ya kieleka. Yandi teleminaka yandi!

¹²⁷ Bantu yikwa vwandaka awa ntangu mu kwendaka na nzietolo ya munu ya ntete, mpe mu longaka, “David kufwaka Goliath,” ntangu mu kwendaka? Bantu mingi, bayankaka, bayankaka kele bantu ya ntama. Mu ke zola kukwenda diaka. Beno ke bambuka moyo na yina, beno me mona yina salamaka na Lumingu me luta? Beto ke na kukota na kitini yankaka. Campagne ya zole ya David, kitini ya zole ya ministere ya yandi. Yina kele kieleka. Ya ke, na ntangu yandi kumaka ntinu na Israel. Beno tala ministere yango ntangu yayi ya ke na kukota na

kitini ya nene, ya me kuma nene mingi. Ya vwandaka mutindu yina samu na David. Mu me mona yayi ntangu yandi kumaka kuna, David, oh, ntangu Nzambi tindaka David kuna samu na kufwaka nkosi, beno tala, mpe samu na kufwa ulusu, na manima samu na kufwa Philistin. Ntangu yayi, ya kumaka ntangu yina Nzambi bikaka mpeve ya yimbi kusimba kiboba ya bakala yayi. Mpe ya . . . Samu na yinki? Samu na kuyina David. Mpe mu ke kwikila . . .

128 Ntangu yayi, ba-bande yayi. Beno kuwa ntangu yayi, bampangi, beno yina ke na kuwa ba-bande, kana beno wisana na munu ve, beno lemvokila munu. Beno me mona, mu ke zolaka beno. Mu ke kutana na beno na simu yina kuna na mutindu nionso, beno me mona, samu kana beno kele muntu ya Nzambi mu ke kutana na beno na mutindu nionso. Kasi, mu ke zola kutuba mutindu yayi, ya ke samu na yayi: Kaka samu Saül yina monaka ti David vwandaka na kima yina yandi vwandaka na yawu ve. Na yina yinki salamaka?

129 Mwa muntu mosi “ya tinta ya mbwaki,” ya kukondwa ngolo, Biblia me tuba ti yandi vwandaka “ya tinta ya mbwaki.” Ya vwandaka mwana ya kitoko ve, “ya tinta ya mbwaki” ya zola kutuba ti ya vwandaka mwa muntu mosi ya kukondwa ngolo. Mpe yandi kwendaka kuna, mpe Saül, na yina, yandi lwataka kinkuti ya kisengo ya Saül, mpe mu ke banza ti kisengo vwandaka kulumuka tii na makulu ya yandi. Mpe yandi tubaka, “Beni katula munu bima yayi nionso. Mu—mu me . . .” Mbala yankaka yandi pesaka yandi diplôme ya doctorat, ya Philosophie to ya Droit, to kima ya mutindu yina, beno zaba. Na yina yandi tubaka, “Mu me zaba kima mosi ve samu na bima yina, samu mu me yikanaka na yawu ve. Beni bika mu baka yayi, yina mu me zaba yinki mutindu kusadila yawu.” Yinga, tata. Yandi bakaka lanse.

130 Mpe ba salaka ti David kubaka makasi samu bana-bakento, mabuundu, mabuundu vwandaka kuyimba, “Saül, lendaka kufwa mafunda ya yandi, kasi David kufwaka makumi ya mafunda.”

131 Na yina yandi kumaka na nkele, “Kima yina ya Nkumbu ya Yesu, Yawu ke na kima mosi ve.” Ya kieleka. Mpe yinki Nzambi salaka na yandi? Nzambi fidisaka mpeve ya yimbi na zulu ya yandi, samu na kuyina David, mpe yandi yinaka David kukondwa kikuma.

132 David lendaka buka yandi nkingu na mwa ntangu fioti. Ya lendaka sala yawu, kasi yandi yambulaka kaka. Yandi tubaka ata kima mosi ve. Ya kieleka ya lendaka sala yawu. Yandi kwendaka kuna mpe yandi zengaka kitini ya kazaka ya yandi, na mpimpa mosi, yandi vutukaka, yandi tubaka, “Tala awa, nge me mona!” Yinga, tata, yandi lendaka kusala yawu, kasi yandi yambulaka yandi kaka. Yandi lendaka panza dibuundu ya

yandi mpe kupanza bantu, mpe kubanda organisation ya yandi mosi kana yandi zolaka kusala yawu. Kasi yandi salaka yawu ve, yandi bikaka Saül kukwenda na ntwala. Beno bika Nzambi kunwana. Yinga, tata.

¹³³ Na yina na ntangu yandi vwandaka kubasika mpe campagne kumaka na nsuka, yandi landilaka nzila ya yandi, mpeve yina ya yimbi na mutindu ti Saül lendaka ve kubaka mvutu na Nzambi. Na manima ya mwa ntangu fioti yandi. . . Mpeve ya Mfumu bikaka yandi. Mpe kiboba ya Samuel, muntu yina bawu losaka, muntu yina vwandaka kieleka Ndinga ya Nzambi samu na bawu, muntu yina tubaka na bawu na ntwala bawu zolaka kusala mutindu yinza.

¹³⁴ Mbala yikwa dibuundu ke zola kusala mutindu yinza? Samu na yinki ba-Pentecotiste, yina bakaka mbotika, ba-Methodiste yina kuzwaka zingulu ya Mpeve-Santu, mpe ba-Baptiste, mpe ba-Presbytérien ke zola kusala mutindu yinza? Samu na yinki bawu ke sala yawu? Mu zaba ve. Mu—mu lenda kaka kubakula yawu ve. Beno ke tuba, “Mbote, ya ke mbote mingi na kubula nsaka ya bakalati, ya ke kaka samu na kusepelisa nzutu, mwa bansaka ya bakalati ya mbongo,” nionso yina beno ke bokilaka yawu. Ya ke disumu. Beno zolaka vwanda na bima yina ve na bayinzo ya beno. “Na yina, ya ke yimbi ve na kubaka mwa dikopa ya fioti, ya bière. Beto me baka kaka mwa fioti. Munu na kento ya munu beto ke bakaka fioti na manima ya midi.” Mpe kima ya ntete beno zaba, bana ya beno ke bakaka yawu fioti. Ya kieleka.

¹³⁵ Mpe beno bakento, hum, diabulu me sala. . . Yawu yina yandi salaka na mbandukulu, mpe ya kieleka ya me sala beno cible beno bampangi-bakento. Yandi ke sala yawu kaka samu. . . samu yandi zaba yina yandi lenda sala. Yandi lenda vuna kento mosi bambala mafunda na nswalu nionso kulutila bakala. Mu zaba ti yina ke lwadisa bansatu ya beno, kasi ya ke ya Kieleka. Ya kieleka. Yawu yina yandi salaka na disamba ya Eden. Yandi lenda sala. . . Ntangu yayi, yandi vwandaka ya kusungama, yandi vwandaka ya kuvedila, kasi yandi vunamaka. “Adam vunamaka ve,” Biblia me tuba yawu. Yandi vunamaka ve, kasi kento kuvunamaka. Na yawu yandi lendaka vuna kento. Kasi ba-pasteur ke mona nsoni ve samu na kubyadisa milongi ya bakento, ba ke pesa bawu luyalu na zulu ya mabuundu mutindu yina, mpe Biblia yayi ke fundisa yawu kubanda na Genèse tii na Apocalypse. Beno ke tuba, “Mbote, ya ke mbote mingi. Ya ke mbote mingi. Ba ke na. . . Ba lendaka longa mutindu mosi na bantu yankaka.” Mu zaba ti ya kieleka.

¹³⁶ Mutindu muntu mosi bandaka kutuba bandinga ya malu-malu na ntangu mosi, mu landilaka kaka na kulonga, mpe ntangu mu basikaka. . .

kento mosi tubaka na mwana ya munu ya bakala, yandi tubaka, “Mu ke na nsangu mosi mu ke pesa mbasi na nkokila,”

yandi tubaka, “ntangu Tata ya nge ke kwisa na estrade.”

Yandi tubaka, “Kasi, Mama, yinki nge zola tuba?”

¹³⁷ Mpe na nkokila yina ntangu ntangu kulungaka, ntangu mu vwandaka yilama samu na kusala lubokilu na autel, yandi yidikaka bansuki ya yandi mpe yandi bendaka ba-bas ya yandi mpe nionso yina, yandi kubamaka, na mbala mosi yandi lemukaka na kati-kati ya allée mpe yandi bandaka na kulemuka, yandi vwandaka tuba bandinga ya malu-malu mpe pesaka profesi. Mu landilaka kaka na kulonga, mu salaka lubokilu na autel. Na yina mu zitisaka yawu ata fioti ve, ya vwandaka ya kusungama ve. Na yina, mbote, Biblia me tuba na kupesa muswa ve, ya me tuba, “Mpeve ya bapofete ke tumamaka na profete.” Nzambi ke . . . Nzambi ke na kutuba na estrade, beno bika Yandi kutuba. Paul tubaka, “Kana muntu mosi ke na luzayikisu, yandi vwanda swi tii kuna yina yankaka ke manisa.” Ya kieleka.

¹³⁸ Ntangu yayi, na manima ntangu mu basikaka, bantu yayi tubaka, nkonga ya bantu mingi, tubaka, “Nge me niongisa Mpeve-Santu na nkokila yayi.”

Mu tubaka, “Yinki yina? Yinki mu me sala?”

¹³⁹ Bawu tubaka, “Mbote, ntangu mpangi yina ya kento pesaka nsangu yina, alleluia,” bawu tubaka, “mutindu yina.”

“Kasi,” mu tubaka, “Mu vwandaka longa. Yandi zitisaka ntumunu ve.”

¹⁴⁰ “Oh,” bawu tubaka, “yina katukaka mbala mosi na Kiti ya kimfumu. Yina ke ya malu-malu kulutila yina nge vwandaka longa.” Uh!

¹⁴¹ Ntangu yayi, yayi ke talisa ti . . . ya ke talisa ti yayi, mpe mu ke tubila beno yawu na luzitu, to ya ke bulawu, to ya ke kukondwa luzitu, to ba me longusamaka na mulongi yina me zaba kima mosi ve samu na Nzambi mutindu lapin me zaba ve basapatu ya mvula-mpembe. Ntangu yayi, yina, mu ke tuba yawu ve samu na kutuba buzoba, samu yayi ke kisika ya bansaka ve. Kasi ya ke—ya ke ya kieleka. Beto fwana zaba ti Nzambi ke yinto ya mubulu ve. Yandi kele ya ngemba. Ba me zaba Biblia ve. Nionso ba me zaba kusala kele kudumuka na zulu, kutuba bandinga ya malu-malu, kutuba, “Mu ke na Mpeve-Santu. Alleluia!”

¹⁴² Mu monaka kuna, na Afrique, bandoki mpe nionso yina vwandaka kutuba, mafunda tanu na mbala mosi; ba vwandaka dumuka na zulu, na menga bisika nionso na kizizi, ba vwandaka tuba bandinga ya malu-malu, mpe vwandaka kunwa menga na mukwa yintu; ba vwandaka bokila diabulu, mpe vwandaka tuba bandinga ya malu-malu.

¹⁴³ Mpe kasi kutuba bandinga ya malu-malu kele dikabu ya Nzambi, kasi yina ke kidimbu ya kieleka ya Mpeve-Santu ve. Beno bika mu tuba yawu na beno ntangu yayi. Mu ke kwikilaka

ti basantu yina nionso me twadisama na kimpeve ke tubaka na bandinga ya malu-malu. Mu ke kwikilaka ti muntu na ntangu mosi na ntangu beno me twadisama mingi na Nzambi na yina beno ke tuba na bandinga ya malu-malu. Mu ke kwikilaka yawu. Kasi mu ke kwikilaka ve ti ya ke kidimbu ti beno me kuzwa Mpeve-Santu. Yinga, tata. Mu ke kwikilaka ti ya ke na bantangu yina beno ke na lukwikilu, muntu, beno lendaka kwenda kuna samu na tetika maboko na zulu ya mwana yina ke na cancer, na ntangu milongi makumi tanu me sambila samu na yandi, mpe yandi ke beluka samu mama yina ke na lukwikilu samu na mwana yina. Nzambi me pesa yawu na yandi, yandi ke kinama ya Nzutu ya Klisto. Yinga, tata. Mu ke kwikilaka yawu. Mu me monaka yawu kusala mpe mu zaba ti ya ke ya kieleka. Kasi yina kele, ya ke kutula dibuundu na ndonga, kutula dibuundu na ndonga na mutindu ti beto lenda sala kisalu.

¹⁴⁴ Ntangu yayi beto manisa kitini ya nzila yayi ya kutanga awa ntete beto kwenda.

. . . na manima beno me kuzwa, beno ba me tula beno kidimbu ya Mpeve-Santu ya nsilulu.

¹⁴⁵ “Kidimbu!” Yinki kele Kidimbu? Yinki kele Kidimbu? Kidimbu kele, ntete ya ke talisa kisalu yina ba me manisa, kisalu ba me manisa. Kima ya kulanda ya ke talisa ti ya ke kima ya muntu. Mpe kima ya kulanda ya ke talisa lukengolo, ti ba me kengila yawu.

¹⁴⁶ Beto tuba, mumbandu, mu vwandaka sala na kompani ya Chemin de fer ya Pennsylvanie, mu vwandaka sala na tata ya munu na chemin de fer. Beto vwandaka fulusa bima na ba-wagon. Mpe beto vwandaka kutula awa na nsi na conserverie, beto vwandaka kutula ba-bwati ya bambisi, mpe beto vwandaka kutula yankaka *awa* mpe yankaka *awa*, mpe yankaka mutindu *yayi*. Kasi na ntwala ba tula kidimbu na wagon yina, nzikisi vwandaka kwisa kuna, mpe ya vwandaka pusa yawu, ya vwandaka bula na zulu ya *yayi*, ya vwandaka ningisa *yina* kuna. “Ah! Beno kanga yawu! Nionso ke kubeba na ntangu ba ke kuma kuna. Beno kanga yawu! Beno basisa yawu. Beno banda diaka.” Nzikisi vwandaka kanga wagon.

¹⁴⁷ Mpeve-Santu kele Nzikisi. Yandi ke ningisa beno mwa fioti, mpe beno ke sala makelele. “Nge ke kwikilaka Ndinga nionso ya Nzambi?”

“Mu ke kwikilaka ve kima yina ya Nkumbu Yesu.”

“Beno kanga yawu. Beno ke sala makelele.”

“Mu ke kwikilaka ve na Kubeluka ya kinzambi to kima ya mutindu yina ve.”

“Ya vwandaka sala kaka makelele. Beno basisa yawu.”

“Nge ke kwikilaka ti Yesu Klisto, ke mutindu mosi mazono . . . ?”

“Mbote, na lweka mosi.”

“Nge ke sala makelele. Beno basisa yawu, beno me mona, ya me kubama ntete ve.” Yinga, tata.

148 Mpangi, ntangu ya me kubama samu na kutuba, “Amen!”

“Nge me kuzwaka Mpeve-Santu?”

“Amen!”

“Ba me manisa bima nionso?”

“Amen.” Na yina yinki ke sala Nzikisi? Ba me fulusa bima nionso mbote-mbote, ya kufuluka na Nsangu ya mbote. Oh, Ndinga nionso ya Nzambi kele mbote. Bima nionso kele ya kulunga. “Mu ke kwikilaka ti Nzambi ke belusa diaka?”

“Nge ke kwikilaka ti Nzambi ke belusa diaka?”

“Amen.”

“Nge ke kwikilaka ti Yesu, ke mutindu mosi mazono mpe kukonda nsuka?”

“Amen.”

“Nge ke kwikilaka ti Mpeve-Santu ke kaka ya kieleka mutindu Ya vwandaka ntete?”

“Amen.”

“Nge ke kwikilaka ti Mpeve yina mosi kubwaka na zulu ya Paul, ke kubwa na zulu ya beto?”

“Amen.”

“Nge ke kwikilaka ti Ya ke sala mambu ya mutindu mosi na zulu ya beto yina yawu salaka na zulu ya bawu?”

“Amen.” Oh, oh, ya me banda na kukuma ngolo ntangu yayi. Beno me mona, ya me banda na kukuma ngolo ntangu yayi, beto me kubama samu na kukanga kielo. Mbote mingi.

149 Na manima nzikisi ke kanga kielo. Yinki yandi ke sala? Yandi ke tula kidimbu na zulu ya yawu. Na manima yandi ke kulumuka awa mpe yandi ke baka mwa ba-pince yina kuna, konso kima yina kuna mpe yandi ke tula kidimbu na zulu ya yawu. Beno fwana sala nionso samu na kubuka yawu ve. Kana yayi, wagon yayi, kisika ya ke kwenda kele Boston, ba lenda kubuka yawu ve. Ya ke vwanda ndola ya boloko kubuka kidimbu yina tii kuna ya ke kuma na Boston. Mpe muntu yina ke na muswa lenda zibula kidimbu yina, mpe yandi kaka. Ya kieleka. Ya ke kima ya kompani ya chemin de fer *kingandi*. Ya ke kidimbu ya bawu. Ya ke kivuvu ti ba me fulusa wagon yayi, wagon yayi me kubama. Ya ke ya bawu. Ba lendaka ve kutula “B&O” na zulu ya wagon ya “Pennsylvanie.” Beno me kuzwa kidimbu, mpe ntangu ba me tula yawu kidimbu.

150 Mpe ntangu Muklisto me fuluka na Nsangu ya mbote, me fuluka na bumbote ya Nzambi, bima nionso ya mbote ya Nzambi kele na kati ya yandi, na ntima ya kuzibula, ya me kubama na

kusala, ya me ndima na kubaka kisika, samu na kusala konso kima yina Mpeve-Santu me tuba na yandi na kusala, ti ya me katuka na lufwa tii na Luzingu, ya me santisama na bima nionso ya yinza, ya ke tambula na kati ya Nsemo mutindu Nsemo ke kwisa na yandi, yandi ke landila na kukwenda na ntwala, yandi me kubama. Na manima Nzambi ke kanga kielo ya yinza na manima ya yandi, mpe ya ke bula kintwadi bitini zole ya kielo mutindu yina, mpe ya ke tula yandi kidimbu na Mpeve-Santu ya nsilulu. Alleluia! Bantangu yikwa? Tii na kisika ya ke kwenda. Kana beno me tula yawu awa na chemin de fer beno buka yawu ve samu na kutala diaka kana bima nionso kele mbote. Nionso kele mbote, beno bika yawu swi. Nzikisi me zikisa yawu. Ba me tula beno kidimbu samu na bantangu yikwa? Tii na kilumbu ya mpulusu ya beno. Ba me tula beno kidimbu tii na ntangu yina.

¹⁵¹ “Mbote, ntangu beno ke kufwa, na yina, Mpangi Branham, yinki ke salama na manima nge ke kufwa, nge me tuba ti nge ke vwanda na Yawu kaka?” Beno ke vwanda na Yawu kukonda nsuka. Wapi kisika Luzingu ke bandaka? Na autel. Na ntangu yina beno ke mwa kivudi ya fioti. Yina ke kivudi, Kidimbu ya Mpeve-Santu. Na manima ya ke kivudi ya bivudi ya bivudi, mutindu mu tubaka kilumbu yina. Kasi ntangu beno ke kufwa, beno ke landila kaka na kutambula na kati ya bivudi yina tii kuna beno ke kuma na kisika ya madidi, katuka na kisika ya madidi beno ke luta na mwa yinto yina ke basisa masa fioti, katuka na mwa yinto beno ke kuma na masa, katuka na masa beno ke kuma na nzadi, katuka na nzadi beno ke kuma na mubu, beno me mona, ya zola ya Nzambi. Beno ke kaka muntu yina mosi.

¹⁵² Beno tala awa. Kiboba ya Saül, retrograde ya ntama, yandi lendaka ve kukuma tii na Nzambi, na yina yandi vwandaka ya kuzimbana ve. Ya kieleka yandi vwandaka ya kuzimbana ve. Yandi vwandaka profete, kasi yandi kwendaka kaka ntama na Nzambi. Yawu yina, bampangi, mu ke tuba ti, “Beno kele ya kuzimbana ve.” Na yawu beno bambuka moyo, yandi basikaka na luzolo ya Nzambi, na yina kima ya ntete beno zaba, yandi—yandi vwandaka ya kuwisana ve. Ntangu yayi, mbala yankaka mu zolaka tuba mutindu yina ve. Mbote mingi, mu ke sepelisa dibuundu ya munu na nkokila yayi. Na yina, beno zaba, mpe kima ya ntete beno zaba, oh, la la, na yina. . . Yandi kwendaka na Urim Thummim.

¹⁵³ Beno zaba yina vwandaka Urim na Thummim, ya vwandaka kinkuti ya ntulu ya kisengo, éphod yina—yina Aaron vwandaka lwata. Mpe ya ke vwandaka ntangu nionso, Nzambi ntangu nionso ke vwandaka Nzambi ya mazulu yina ke pesaka mvutu na banzila ya mazulu. Mpe ntangu profete mosi me pesa profesi, mpe kana bansemo ya mystique me kupela ve na Urim Thummim yina, yandi vwandaka na kifu. Ntangu muntu me lota ndosi mosi mpe ya me pela ve na Urim Thummim yina, ata ti ndosi

monanaka ya mbote, ya vwandaka na kifu. Ya kieleka.

154 Mpe mu ke kipe ve ba-diplôme ya doctorat yikwa beno ke na yawu mpe wapi mutindu organisation ya beno kele ya nene, ntangu beno ke pesa profesu to beno ke longa, ya me wisana na Ndinga yayi ve, beno ke na kifu, mpangi. Beno ke. . . Yayi ke Urim Thummim ya Nzambi. Ntangu beno ke tuba ti ba zabaka beno ve na ntwala ya mbandukulu ya yinza, yawu ke pela ve, samu Biblia me tuba mutindu yina. Ntangu beno ke tuba ti beno fwana baka mbotika na nkumbu ya “Tata, Mwana, Mpeve-Santu,” ya ke pela ve, samu muntu mosi ve na kati ya Biblia me botamaka mutindu yina. Kaka na Nkumbu ya Mfumu Yesu. Ya ke pela ve, na yawu kima mosi ke tambula mbote ve.

155 Na yawu Urim Thummim lendaka pesa mvutu na kiboba ya Saül ve, mpe yandi lendaka kuzwa ata ndosi mosi ve. Yandi kwendaka ntama mingi tii kuna yandi lendaka kuzwa ata ndosi mosi ve. Na yawu beno zaba yina yandi salaka? Yandi kwendaka kuna na nganga-nkisi ya kento, mpe nganga-nkisi yayi ya ntama, mwa nganga-nkisi yayi ya kento kuna, nganga-nkisi ya kento. Mpe yandi tubaka, “Nge lenda sala lumoni?”

156 Yandi tubaka, “Yinga, kasi Saül tubaka ti yandi ke kufwa bantu yina nionso ke sala lumoni.”

157 Yandi tubaka, “Mu ke tanina nge,” yandi lwataka mutindu fantassin. Yandi tubaka, “Sala lumoni samu na munu mpe basisila munu na yinza ya bantu ya kufwa yina ke na simu yina kuna.” Ntangu yayi beno kuwa yayi. “Basisila munu mpeve ya profete Samuel.”

158 Mpe yandi bandaka na—na kusala lumoni. Mpe, ntangu yandi salaka yawu, yandi kubwaka na kizizi ya yandi, yandi tubaka, “Mu ke mona banzambi ke kwisa mata.” Beno me mona, yandi vwandaka mumpani, “banzambi,” zole to tatu na kati ya bawu, mutindu Tata, Mwana, Mpeve-Santu, to kima mosi ya mutindu yina, beno zaba. Yandi tubaka—yandi tubaka, “Mu ke mona banzambi ke na kumata.”

159 Yandi tubaka, “Tendula yandi. Wapi mutindu yandi kele? Ya me fwanana na nani?”

160 Yandi tubaka, “Yandi kele fioti mpe yandi ke na kazaka na zulu ya mapeka ya yandi.” Yandi vwandaka me soba, ata fioti ve.

161 Yandi tubaka, “Ya ke Samuele. Nata yandi na kivinga yayi, nata yandi awa na ntwala ya munu.”

162 Mpe beno tala ntangu Samuel kwisaka na ntwala ya Saül, yandi tubaka, “Samu na yinki nge me bokila munu, samu nge me kuma mbeni ya Nzambi?” Mpe beno tala. Yandi vwandaka kaka Samuel ve, kasi yandi vwandaka kaka na mpeve ya profesu. Beno tuba ti ya ke luvunu, muntu mosi kumeka kutuba ti ya ke luvunu. Ya ke Kieleka! Yandi vwandaka kaka profete. Samu yandi tubaka, yandi pesaka profesu mpe tubaka, “Bitumba ke

wwanda yimbi samu na nge mbasi, mpe nge na bana ya nge ke kufwa na bitumba mbasi, mpe kaka na ntangu yayi mbasi na nkokila nge ke wwanda na munu.” Ya kieleka? Yandi wwandaka kaka profete!

Ntangu yayi beno ke tuba, “Oh, kasi yina nganga-nkisi salaka yawu.”

¹⁶³ Mbote mingi, mu ke tuba na beno Mosi yina wwandaka nganga-nkisi ve. Yesu bakaka Pierre, Jacques, na Jean, mpe ba kwendaka na Mongo ya Nsobolo na ntangu mosi, mpe wwandaka ya kutelema kuna na zulu ya mongo. Mpe, Yesu, Nzambi wwandaka kutula na kisika Mwana ya Yandi; mutindu mu ke na kumeka yayi. . . yina wwandaka zonzila na nkokila yina, kutula mwana na kisika. Mpe ntangu ba salaka yawu, ba talaka kuna mpe ba monaka ti Moise wwandaka ya kutelema kuna na Elie. Ba wwandaka tuba, ba wwandaka solula. Ya wwandaka ve mwa ba-bandele ya mpembe ke tepa kuna, to mwa matuti ya mpembe kuna, yina, wwandaka kutepa kuna. Kasi ya wwandaka bantu, ke solula. Moise ba zikaka yandi na ntoni yina me zabana ve bamvula nkama nana na ntwala. Mpe Elie vutukaka na Yinzo na lukalu, bamvula nkama tanu. Mpe bawu zole wwandaka ya kutelema kuna, kaka na luzingu mutindu ba wwandaka zinga, ba wwandaka ya kutelama kuna ke solula na Yandi na ntwala Yandi kwenda na Calvaire. Alleluia! “Ba me tula beno kidimbu tii na kilumbu ya mpulusu ya beto!”

¹⁶⁴ Mu ke sala nswalu, mpe na manima beto ke sukisa samu ntangu me luta, mpe beto ke sambila samu na bambevo, na minuti tanu diaka. Nzila ya 14, beno tanga, beno bika mu tanga diaka nzila ya 13, samu, beto baka dibanza ya yawu.

Kati na yandi beno . . . tulaka kivuvu, na manima beno me kuwa ndinga ya kieleka, nsangu ya mbote ya mpulusu ya beno: . . .

¹⁶⁵ Ntangu yayi beno bambuka moyo, yinki mpulusu ba ke na yawu? Bayayi—bayayi wwandaka Baklisto ya Ephèse. Bawu, ntangu yayi beno tala, beno me bakula ba-Corinthien? Yandi wwandaka tuba na bawu ntangu nionso, “Ntangu mu ke kwisa na kati ya beno, mosi ke tuba na ndinga ya malu-malu, mosi ke tuba na ndinga ya malu-malu, mosi ke kuzwa nkunga, mosi ke kuzwa profesu, mosi ke na . . .” Beno me mona, yandi lendaka longa bawu kima mosi ve, samu ba wwandaka kuzola ntangu nionso yayi, yina to yankaka. Bantu yayi wwandaka na kima ya mutindu mosi, kasi ba wwandaka na yawu na ndonga. Yandi longaka ata fioti ve ba-Corinthiens kima ya mutindu yayi, yandi lendaka sala yawu ve, dibuundu wwandaka na ndonga ve samu na kulonga yawu. Ntangu yayi, yandi lendaka longa bantu yayi kima ya kieleka.

. . . na yina, mpulusu ya beno: kati ya yandi diaka na manima . . . beno me kwikila, ba me tula beno kidimbu

ya Mpeve-Santu ya nsilulu,

*Yina ke lufutu . . . (oh, beno bika mu luta yawu ve) . . .
lufutu ya difwa ya beto tii . . . samu na mpulusu ya
bayina Nzambi me sumba, samu na lukumu ya nkembo
ya yandi.*

Fiou!

¹⁶⁶ Yinki kele Mpeve-Santu? Ntangu yayi, na yina mu ke tanga kitini ya yawu na nswalu nionso kana beno ke kangila munu ntima tii kuna. Wapi kisika beto vwandaka na nkokila yina, Mpangi Mike? Kisika ba vwandaka bawu nionso na kiese, oh, ya vwandaka kaka na kiese, yina vwanda zola ya kulunga. Ntangu yayi, na konso dikulu beno ke tula na lweka *yayi* beno ke kubwa fioti, beno ke kubwa. Na konso kitambi beno ke tula, beno ke kuma beno pene-pene mingi na mwa bitamina. Ntangu ya ke kuma na ntoto, beno ke na kivudi ya kivudi ya kivudi ya bivudi. Ntangu yayi, yina ke kitezo ya Mpeve-Santu beno ke na yawu na kati ya beno. Yina ke zola. Kasi, oh, beno ke na mpwila ya kima mosi.

¹⁶⁷ Oh, ya kieleka ve ti bantu mutindu biboba, biboba . . . Wapi mutindu mu ke zola kuvutukisa diaka na bamvula kumi na tanu, bamvula makumi zole! Oh, mu ke pesa konso kima yina. Yinki mbote ya ke sala munu? Mu lendaka vwanda na bamvula kumi na tanu mpe kufwa diaka na nkokila yayi. Ya ke ya kutudila ntima ve. Yinki ke salama kana beno vwandaka na bamvula kumi na tanu na nkokila yayi, wapi mutindu beno zaba ti mama ya beno ke vwanda ya moyo, ntangu beno ke vutuka na yinzo, to ve? Wapi mutindu beno zaba ti beno ke vutuka na yinzo? Wapi mutindu beno ke zaba ti beno ke vwanda na luzingu mbasi ata ti beno ke na bamvula makumi zole, na mavimpi ya mbote? Ba lendaka kufwa beno na kusumbula, kufwa na kintulumukina, konso kima yina lendaka salamina beno. Kima ya kutudila ntima ve, beno me mona. Ya ke na kima ya kutudila ntima ve awa. Kasi beno ke vumuna mingi samu na yawu. Yinki yina? Ya ke Yina ke Kuna ke sala ti beno vumuna samu na yawu.

¹⁶⁸ Ntangu yayi, beno ke tambula na kati ya Yayi, na yina beno ke na Luzingu ya Kukonda nsuka. Ntangu yayi yinki ke salama? Ya ke “lufutu.”

¹⁶⁹ Yinki kele lufutu samu na kima mosi? Kana mu me kwisa samu na kusumba tomabilu, mu ke tuba, “Tomabilu yayi ke na ntalu yikwa?”

¹⁷⁰ Beno ke tuba, “Tomabilu, Mpangi Branham, ke na ntalu ya ba-dollars mafunda tatu.”

“Avance kele yikwa?”

“Mbote, mu ke pesa yawu na nge na nkama tanu ya ba-dollars.”

171 “Mbote mingi, awa kele na ba-dollars bankama tanu. Mu ke—mu ke natila nge yina me bikala, na ntangu mu ke kuzwa yawu. Beno simba tomabilu.” Mu ke pesa nge bankama tanu ya ba-dollar, yina ke lufutu. Yina ke ya kieleka?

172 Ntangu yayi, beno simba yawu, ya ke “lufutu,” ya ke “avance.”

. . . na manima ba me tula beno kidimbu na . . . Mpeve ya nsilulu, . . . Mpeve ya nsilulu, . . . na manima ba me tula beno kidimbu . . .

Yina ke . . .

Yinki? Yinki kele Kidimbu ya nsilulu, Mpeve-Santu ya nsilulu?

Yina kele lufutu ya difwa ya beto tii . . . samu na mpulusu ya bayina Nzambi me sumba, . . .

173 Yinki ya kele? Ya ke avance. Mpe, mpangi, oh, oh, oh, oh, oh, milongi! Kana yayi kele avance, yinki ke salama ntangu beto nionso ke vwanda kuna! Yinki ya ke vwanda? Kana yayi ke . . . Kana yayi ke yina ke sepelisaka beto ntangu yayi, mpe beno vwanda na kiesa mingi tii . . . Mu monaka babakala ya bamvula makumi yivwa kukwisa . . .

174 Mu monaka mulongi mosi ya kiboba kutelema na nkokila mosi. Yandi kwisaka kuna, yandi tubaka . . . Mutindu *yayi*, ya vwandaka kwisa na estrade. Mpe mu tubaka, “Bakala yina ya kiboba ke longa?”

175 Yandi tubaka, “Mbote, Mfumu kusakumuka.” Muntu mosi ya ndombe, yandi lwataka kazaka mosi ya yinda ya milongi.

176 Mu tubaka, “Samu na yinki ba me bika ve bantwenia yina ya milongi kulonga? Bakala yina ya kiboba, yinki mutindu yandi lendaka longa?”

177 Yandi tubaka, “Mbote,” yandi tubaka, “bampangi,” yandi tubaka, “bubu yayi mu me kuwa bampangi kulonga kilumbu bu muvimba,” yandi tubaka, “samu na yina Yesu salaka na zulu ya ntoto. Mu ke tuba na beno yina Yandi salaka na Zulu.” Yandi tubaka, “Mu ke baka dilongi ya munu na Job 7:27,” yandi tubaka, “ntangu ya vwandaka ntama mingi kuna na mbandukulu ya yinza,” yandi tubaka, “ntangu Yandi tubaka bambwetete ya suka bandaka na kuyimbila kintwadi mpe bana ya Nzambi bokaka na kiesa.” Yandi bandaka mutindu yina. Yandi tubaka, “Beno zaba kuna, kima mosi salamaka.” Yandi tubaka, “Nge zaba . . .” Mpe yandi bandaka na kuzonzila yina salamaka na Zulu. Yandi tendulaka yawu na kukulumukaka arc-en-ciel landila diboko ya kibakala tii na Nkwizulu ya zole. Kaka na mwa ntangu yina, Mpeve-Santu kulumukaka na zulu ya yandi. Ntangu yayi, ya lombaka ti ba twadisa kiboba yina kuna, yandi vwandaka na bamvula pene-pene ya makumi yivwa na tanu. Yandi vwandaka mutindu *yayi*, ya kufumbama, mpe na mwa

ndambu ya bansuki, beno zaba, mutindu *yayi*. Yandi kumaka kuna mpe yandi bandaka na kulonga, yandi tubaka, “Youpi! Alleluia! Nkembo!” Yandi bandaka na kudumuka mutindu *yayi*. Yandi tubaka, “Oh, beno ke na kivinga ya mingi ve awa samu mu longi.” Mpe yandi me kwenda, na nsi mutindu yina, na mbangu nionso. Mpe ya kele kaka lufutu. Oh!

178 Yinki Mpeve-Santu ke salaka? Oh, awa ke kisika ya mbote, beno bika mu tanga nzila ya 1 ya kapu yina ke landa. Mu lenda sala yawu? Ya kele mbote? Beno tuba, “Amen.” [Dibuundu me tuba, “Amen!”—Mu.] Mbote mingi, nzila ya 1 ya kapu ya 2, na nswalu nionso. Beno kuwa:

Beno, bayina vwandaka... beno... *Mpe yandi me kindisa beno, beno yina vwandaka... beno vwandaka ya kufwa na yimbi mpe masumu ya beno.*

179 “Yandi me vutula beno na luzingu.” Yinki zola tuba *kuvutula na luzingu?* “Kupesa luzingu.” Beno vwandaka kaka ya kufwa, kasi Yandi me vutula beno na luzingu kaka na lufutu. Yinki ya ke vwanda ntangu beno—ntangu beno ke kuzwa kieleka bandandu nionso? Oh! Kuyituka ve ti Paul, ntangu yandi kwendaka na zulu ya tatu, yandi tubaka, “Ya ke bima yina disu me monaka ve; dikutu me kuwaka ve; to ya me kotaka ve, ya me kotaka ve na ntima ya muntu, yina Nzambi ke na yawu samu bawu (na kati ya kibumbulu) yina ke zolaka Yandi.” Yinki ya ke vwanda! Beno ke zonzila kiese yina ba lendaka kuzonzila ve mpe ya kufuluka na nkembo! Fiou! Uhm! Beno yina vwandaka ntete ya kufwa na masumu mpe yimbi ya beno Yandi me vutula beno na luzingu kintwadi na kivudi ya kivudi ya bivudi. Yinki ya ke vwanda ntangu beno ke luta na kivudi ya bivudi na kivudi, na manima ya kivudi na masa, na masa na nzadi, na nzadi na mubu?

180 Mpe yinki ya ke vwanda ntangu beno ke vwanda ntama kuna na mpulusu, na nzutu ya malu-malu, beno ke kuma diaka ntwenia ya bakala, to ntwenia ya kento, beno ke kufwa diaka ve? Mpe beno ke tala na ntoto, mpe beno ke banza, “Mu ke sepela na kudia mwa bambuma ya raisin mpe kunwa masa ya madidi, kasi, beno zaba, mu ke na nsatu ya yawu ve awa. Kasi kilumbu mosi Yesu ke kwisa, mpe nzutu *yayi* ya bawanzio, nzutu *yayi* ya kimpeve kisika mu ke na kuzinga...” Ke luta diaka ve na kivumu ya kento, ya ke luta diaka ve na mpusa ya nzutu; kasi samu ti Yandi butukaka kukondwa mpusa ya nzutu, mu ke vumbuka na lufwa kukondwa yawu, mpe Yandi ke tuba kilumbu mosi mpe bantu yina kufwaka kati na Klisto ke vumbuka na lufwa, mpe nzutu yina mu vwandaka kuzinga ntete ke vumbuka na nzutu yina ya nkembo, mpe mu ke tambula mpe mu ke tambula, mpe mu ke zinga mpe mu ke sepela (alleluia), Mu ke zinga na bansungi ya Kukonda nsuka yina ke kwisa, na Yesu Klisto Mfumu ya beto. Fiou! Yawu yina, mpangi, yina ke Nsangu ya mbote!

181 “Yawu yina munu mpe,” Paul ke tubila ntangu yayi yina yandi kele. Mu ke ntanga yina me bikala mpe na manima beto ke sambila samu na bambevo. “Tii na luyalu, yayi kele lufutu tii na luyalu, samu na balukumu ya nkembo ya Yandi.”

Yawu yina munu mpe, na manima ya kuwa lukwikilu ya beno (Mu me kuwa ti beno ke kwikilaka mambu yayi, Mu me kuwa ya kieleka ti beno ke kwikilaka na predestination, Luzingu ya Kukonda nsuka, mpe mpulusu, mpe nionso yina) na Mfumu Yesu, mpe zola ya beno samu na . . . basantu nionso,

Mu ke na kubika ve na kutonda Nzambi samu na beno, mu ke sambidilaka beno;

Mpe mu ke lombaka na Mfumu Yesu Klisto, Tata ya nkembo, na kupesa beno ndwenga yina ke lakisa beno yandi . . . mpe ke sala ti beno zaba yandi kieleka: Yandi ke landila kaka na kukitalisa na beno ntangu nionso, samu beno kukula lemvo na lemvo, ngolo na ngolo, nkembo na nkembo. Kuvutuka na manima ve; mpe, nkembo na nkembo, na kukwendaka na ntuala ntangu nionso. Mu ke kubika ve na kusambidilaka beno.

Disu—meso ya lubakulu ya beno . . .

182 Hum! Beno zaba, na kati ya Biblia beno vwandaka meso ya kufwa mpe beno zabaka yawu ve. Kasi awa Paul me tuba, “Mu ke sambilaka ti meso ya beno ya lubakulu . . .” Beno ke bakulaka na ntima ya beno. Yawu yina yandi ke na kuzonzila. Beno ke talaka na disu ya beno, kasi beno ke monaka na ntima ya beno. Beno zaba yawu. Mbote mingi. “Ti Nzambi ya Nkembo . . .” Beto tala, nzila ya 18.

Bika yandi zibula bantima ya beno na nsemo ya yandi; samu ti beno bakula kivuvu yina kele na kati ya lubokilu yina yandi salaka kuna na beno, mpe wapi mutindu kele bunene ya nkembo ya . . . nkembo ya yandi mpe ya difwa yina yandi ke pesa basantu,

Mpe beno ke bakula mpe wapi mutindu kele bunene ya kulutula ya ngolo ya yandi samu na beto . . . (fiou! Ba ke tubaka ti ngolo me kwendaka? Ngolo me kuma ntete ve) . . . yina ke kwikilaka yandi, landila ngolo yina Nzambi lakisaka yawu na ngolo ya yandi ya kulutula, (Beni yina kwikilaka na bisalu ya ngolo ya Yandi, mu ke sambila ti Nzambi kutiamuna ngolo ya Yandi na zulu ya beno. Beno me mona?)

Yina yandi mwangisaka kati na Klisto, ntangu yandi vumbulaka yandi—yandi na lufwa, mpe vwandisaka yandi na diboko ya yandi ya bakala . . . bisika ya mazulu,

Kuna Klisto ke na kuyala bantinu nionso, bimfumu nionso, bayina nionso ke na ngolo, bayina ke yalaka yinza, mpe konso nkumbu, . . .

183 Oh, oh, oh! Samu- . . . Ve, kulutila mbote ve. Beto lendaka baka kitini ya nkokila na zulu ya yawu.

. . . konso nkumbu yina bantu lendaka kuzonzila, na yinza yayi kaka ve, kasi diaka na yinza yina ke kwisa:

184 Yinki kele konso—yinki kele konso nkumbu yina? Konso nkumbu yina muntu nionso ke baka yinki Nkumbu? [Dibuundu me tuba, “Yesu.”—Mu.] Zulu ya muvimba ba me bokila yawu Yesu. Bima nionso ba me bokila yawu Yesu, samu Ya ke kaka Nkumbu yina Nzambi ke vwandaka na yawu. Ba me bokila Yandi Yehowa: Yehowa-yile, Mfumu me pesa Munkayulu; Yehowarapha, Mfumu yina ke belusaka nge; Yehowa, bendele ya Mfumu, Manassé; mpe Yehowa, ba-Yehowa mingi. Ba ke bokilaka Yandi Mbwetete ya Suka. Ba ke bokila Yandi Tata, ba ke bokila Yandi Mwana, ba ke bokila Yandi Mpeve-Santu. Ba ke bokila Yandi Alfa, ba ke bokila Yandi Omega. Ba ke bokila Yandi Mbandukulu, ba ke bokila Yandi Nsuka. Ba ke bokila Yandi Nkuna. Oh, ba ke bokila Yandi . . . Ba ke bokila Yandi kaka landila bisalu ya mutindu na mutindu, kasi Yandi vwandaka na Nkumbu mosi.

185 Yawu yina Matthieu vwandaka zonzila, ntangu Yandi tubaka, “Beno kwenda bisika nionso mpe beno longa na bayinsi nionso, beno botika bawu na Nkumbu,” na bankumbu ve, “na Nkumbu ya Tata, Mwana, mpe Mpeve-Santu.” Tata kele nkumbu ve, Mwana kele nkumbu ve, Mpeve-Santu kele nkumbu ve. Ya ke kisalalu ya Nkumbu. Ya ke Nkumbu ya bisalu tatu yina kele ya Nzambi mosi. Yinki vwandaka Nkumbu ya Yandi? Wanzio tubaka, “Nge ke bokila Nkumbu ya Yandi . . .” [Dibuundu me tuba, “Yesu.”—Mu.] “samu Yandi ke vulusa bantu ya Yandi na masumu ya bawu.” Kikuma yawu yina bawu nionso bakaka mbotika mutindu yina na kati ya Biblia. Ya ke mutindu yina Santu Augustin botikaka Ntinu ya Angleterre, pene—pene ya bamvula nkama mosi na makumi tanu, bamvula nkama zole na manima ya lufwa ya Klisto, na Nkumbu ya Yesu Klisto. Mbote mingi.

Na zulu ya bantinu nionso, bimfumu nionso, bayina nionso ke na ngolo, bayina ke yalaka yinza, ti—ti konso nkumbu yina bantu lenda kuzonzila, na yinza yayi kaka ve, kasi diaka na yinza yina ke kwisa:

Mpe Nzambi salaka ti bima nionso kuvwanda na lutumu ya Klisto, mpe tulaka yandi samu na kuvwanda yintu ya dibuundu,

Yina kele nzutu ya yandi, . . .

¹⁸⁶ Ntangu yayi, kana nzutu ya munu kele na luyalu na zulu ya bima nionso, na yawu yina kele nzutu ya munu yawu yina mu kele. Ya kieleka? Yawu yina mu kele, beno me zaba munu mutindu yina. Ya kieleka? Mbote, na yina, nionso yina Nzambi vwandaka, Yandi tiamunaka yawu kati na Yesu, samu Yandi vwandaka muvimba ya Bunzambi kati na nzutu. Ya kieleka? Mpe nionso yina Yesu vwandaka, Yandi tiamunaka yawu na kati ya Dibuundu, “Bima yayi mu ke sala, beno mpe ke sala yawu nionso. Beno ke sala mpe ya kulutila nene, samu mu ke kwenda na Tata.”

Yina kele nzutu ya yandi, yandi mosi ke fulusaka nzutu na luzingu nionso ya yandi.

¹⁸⁷ Oh, wapi mutindu mu zola yawu! Wapi mutindu mu zola yawu! Mu vwandaka tanga kilumbu yina buku yina ba sonikaka samu na nzietolo mosi mu kwendaka longa—longa na Afrique. Mu me tangaka yawu ntete ata fioti ve. Bantu yikwa me tangaka buku yayi, *Profete Me Kwenda Kutala Afrique?* Na kati kuna mu vwandaka tala mwana-bakala mosi ya Indien. Bantu yikwa me monaka kizizi yina?

¹⁸⁸ Mu kuwaka evangéliste mosi, yina ke sambilaka samu na bambevo kubanda bamvula kumi na tanu to kulutila yina, yandi tubaka, “Mu me monaka ata fioti ve kimangu mosi kusalama na luzingu ya munu.” Yandi tubaka, “Mu me monaka bantu yina kutubaka ti ba vwandaka na mpasi ya yintu, kubeluka. Mu me monaka bantu ke tuba ti ba vwandaka na mpasi ya kivumu, kubeluka, mpe nionso yina. Kasi kimangu, kima yina ba vangaka mpe salaka kima mosi . . .”

¹⁸⁹ Mu banzaka ti mwana-bakala yina lendaka vwanda kuna samu na kumona yawu. Dikulu ya mwana-bakala yina ya Indien vwandaka fioti nene mutindu *yayi*, mosi ya makulu ya yandi. Yina yankaka vwandaka mbote mutindu dikulu ya muntu. Mpe, kana beno tala, appareil orthopédique ya yandi, sapatu ya yandi vwandaka ya kumata pene ya ba-centimetre makumi tatu na tanu to makumi tatu na sambwadi, mutindu yayi. Yandi vwandaka na plaque mosi ya kisengo na nsi ya yawu. Sapatu ya yandi vwandaka ya kumata na zulu ya ba-support zole. Yandi kwisaka tii na kisika yina mu vwandaka, ba matisaka yandi kuna na zulu. Yandi vwandaka na ba-béquille zole. Yandi bakaka sapatu yayi ya nene ya kisengo mpe losaka yawu ngolo na ntoto mutindu yina. Mu talaka dikulu ya yandi, ya vwandaka fioti nene mutindu *yayi*.

¹⁹⁰ Ntangu yayi, bantu yina kele ba-Musulman, ba-Musulman. Beno ke bambuka moyo Lumingu me luta ntangu mu tangilaka beno yina bazulunale kusunikaka? Mu ke na yawu awa, katuka na Afrique, ba me tinda munu yawu na missionnaire mosi me katuka kuna, Mpangi Stricker. Zulunale yawu yayi mutindu Billy Graham vutukisaka na manima kuna. Ya kieleka. Ba ke

bika ba-Musulman kupusa bawu na kukota na nzadi. Yinki kele diambu? Ba-missionaire ke na kukatuka na bisika ya kisalu. Yinki kele mfunu na kubikala ntangu ya yinda? Ba me bula bawu fimbu.

¹⁹¹ Mu ke zolaka Billy Graham, mpe mu banza ti yandi ke muntu ya mbote ya Nzambi. Kasi yina Billy Graham lendaka kutelemina yandi, kutuba, “Vingila fioti . . .” Kana ba-Baptiste yayi ya mambu ya nganda lendaka bika yandi kusala yawu, mu ke kwikila ti yandi lendaka sala yawu. Mu ke kwikila ti Billy Graham kele muntu ya Nzambi. Kasi kana yandi fwanaka tuba, “Vingila fioti! Mu ke longi ya Nsangu ya mbote. Beno ke kwikilaka Ngwisani ya Ntama, mpe beno ke tubaka ti Yesu vwandaka kaka muntu. Mu ke tula na beno ntembe na masolo.” Mu ke kwikilaka ve na kutula ntembe na diabulu, ve tata, kasi mu zolaka kutula na yandi ntembe, mpe mu zolaka tuba, “Beno na munu beto kutana. Mu ke Docteur ya Théologie,” Billy Graham kele Docteur ya Théologie. “Mu ke tula na beno ntembe samu na yayi, mpe beno bika mu siamisa na beno ti Yesu vwandaka Klisto. Ntangu yayi, ntangu ya me kuma kubeluka ya Kinzambi, mu ke na makabu yina ve, kasi beto ke na bampangi yina ke na yawu. Ntangu yayi, kana beno zola kuvukisa bantu kuna, beno bika mu bokila mosi ya bawu, Oral Roberts to muntu mosi, muntu yina ke na ministere ya nene yina lendaka vwanda kieleka ngolo.” Kuna, na manima ba zolaka mona yina ke salama, yandi zolaka kutuba, “Buklisto kele ve yina beno ke banzaka.”

¹⁹² Ntangu yayi bantu nionso ke na kiadi samu yandi bikaka kuna mpe yandi me kwenda. Na yina, ntangu yayi, mu ke kwikilaka ve ti beto fwana bika diabulu kutula na beto ntembe. Mu me losilaka yandi mate na kizizi mutindu yina, mpe mu bikaka yandi kuna. Ya kieleka. Kasi ntangu ya me kuma kisika yina . . . Billy lendaka—lendaka sala ti Musulman yina kukitala mutindu kima ya fioti kasi ya nene mingi ve mutindu *yina*. Yandi zolaka baka Biblia mpe kubaka Esaie 9:6, mpe kutuba, “Nani ya vwandaka tubila, ‘Mwana me butuka na beto, ba me pesa beto Mwana ya bakala?’ Nani vwandaka Muntu yayi? Nani vwandaka Yayi yandi vwandaka tubila? Nani vwandaka Profete yayi? Nani vwandaka Messie yayi fwana kwisa? Beno talisa munu kisika Yandi talisamaka Yandi mosi na Mahomet. ‘Yandi lwalaka samu beto tumamaka ve, waka mpasi na ntima samu na masumu ya beto ya nkú, mpasi yina ke pesaka beto ngemba kubwaka na zulu ya Yandi, na bampata ya Yandi beto me beluka.’ Beno talisa munu yawu na Mahomet. Wapi ntangu Yandi bokaka, ‘Nzambi ya Munu, Nzambi ya Munu, samu na yinki Nge me yambula Munu? Ba me tobola maboko ya Munu mpe makulu ya Munu,’ mpe nionso yina? Beno talisa munu na ndinga ya beno mosi, na ngwisani ya beno mosi.” Na yina, yandi zolaka bula Musulman yina na mutindu ti yandi zolaka zaba diaka ve kisika yandi

vwandaka. Ya kieleka.

¹⁹³ Kasi ntangu ya lombaka ti zulunale kubaluka, yawu yina salaka mpasi, yawu yina pesaka munu mpasi na ntima. Ya vwandaka tuba kuna, “Ata ti Billy kuvukisaka na manima mpe vutukisaka na manima, wapi mutindu ba-Musulman lenda tuba ti yina vwandaka luvunu,” ya tubaka, “ntangu Revérend William Branham na Durban, na Afrique du Sud, kimangu na manima kimangu yina ba lenda tudila ntembe ve, yina salamaka na ngolo ya Kinzambi, ntangu mafunda ya ba-Musulman kubwaka na kizizi ya bawu na ntangu yina mpe pesaka luzingu ya bawu na Yesu Klisto.” Ya kieleka. Bawu zaba yawu. Ba-fondamentaliste yayi me zaba yawu. Beno tuba na munu kima yankaka ve.

¹⁹⁴ Na ntangu mosi ya vwandaka na mosi kwisaka na Yesu, yandi tubaka, “Rabbi!” Beno zaba yandi vwandaka Pharisien. Yandi tubaka, “Beto zaba ti Nge ke Mulongi yina me katuka na Nzambi. Beto zaba yawu. Beto zaba yawu, samu muntu mosi ve lenda sala bima yina Nge ke sala kukondwa Nzambi kuvwanda na yandi. Beto me bakula. Beto zaba yawu. Kasi beto lenda kutuba yawu ve, beno me mona, samu kana beto me sala yawu, mbote, ba ke tula beto na nganda ya dibuundu ya beto. Beno me mona, beto ke zimbisa lukumu ya beto.” Mpe na yawu Yesu tubaka, ya bandaka na kutuba na yandi ti yandi fwana kubutuka mbala zole.

¹⁹⁵ Samu na kuvukila mwana-bakala yina ya Musulman, ntangu yandi vwandaka kuna, beno tala foto ya yandi. Camera ke baka luvunu ve. Yawu yina me telema kuna, dikulu yina ke nkufi mingi (pene ya ba-centimetre makumi tatu na tanu) kulutila yina yankaka, ya me telema na sapatu yina ya kisengo. Mu tubaka na yandi, mu tubaka, “Nge ke tubaka Kingelesi?”

¹⁹⁶ “Ve, tata.” Mu lenda tuba Kingelesi ve. Mutendudi tubaka, “Yandi ke tubaka Kingelesi ve.”

“Kubanda yinki ntangu nge ke mutindu yayi?” Mutendudi yufulaka yandi.

“Kubanda lubutuku.”

“Nge lenda ningisa dikulu nionso?”

“Ve, tata.”

“Nge ke kwikilaka na Yesu Klisto?”

Yandi tubaka, “Mu ke Musulman.”

Mu tubaka, “Nge ke ndima Yesu Klisto kana Yandi belusa nge?”

¹⁹⁷ “Mu ke ndima Yesu Klisto mutindu Mvulusi ya munu kana Yandi belusa munu.”

¹⁹⁸ “Kana Yandi ke belusa yawu, ti dikulu yina kukuma mutindu yina yankaka, nge ke ndima Yandi?”

“Mu ke ndima.”

199 “Mbote, Nzambi, yinki Nge ke sala?” Yayi ke kima ya kulanda, bakiuvu nionso me baka mvutu. Mpangi Mike, yina ke sensation. Mu vingilaka muniti mosi samu na kutala yina Yandi ke tuba. Mu talaka kuna mpe mu monaka mwana-bakala yango ke na kukwenda, ke na kutambula, mutindu na lweka ya bibaka mutindu yina. Mu tubaka, “Yikwa na kati ya beno ba-Musulman ke kwikila yawu? Mwana-bakala ya Musulman yandi yayi, beno tala yandi, beno telemisa yandi kuna.” Mu tubaka, “Beno badokotolo, beno zola kutala yandi? Yandi yina me telema kuna.” Oh, beno zaba kisika beno kele na ntangu yina. Beno me mona, beno zaba kisika beno me telema. Muntu mosi ve. . . Kuna yandi vwandaka.

200 Mu tubaka, “Tambula tii na kisika yayi, mwana.” Mpe ba bakaka yandi, yandi kwisaka awa. (“Ntaa, ntaa.”) Mu tubaka, “Ya ke monana ti ya me kuma na ba-centimetre pene ya makumi tatu, makumi tatu na tanu fioti. Pene na *yawu*.”

“Yinga.”

201 Mu tubaka, “Kasi Yesu Klisto Mwana ya Nzambi lenda belusa yandi. Beno ba-Musulman ke kwikila yawu mpe ke ndima Yandi mutindu Mvulusi ya beno mosi?”

202 Mafunda ya maboko ya ndombe kutelemaka na zulu bisika nionso mutindu yayi. “Mbote, Mfumu, ntangu me lunga ntangu yayi.” Mu tubaka, “Tata ya Mazulu, kana Nge me pesaka ntete mvutu, pesa munu mvutu ntangu yayi, yayi ke samu na Nkembo ya Nge, yayi ke samu na Nge. Mu ke sambila Nge na kubelusa mwana-bakala yayi.” Mu sambilaka kaka samu na yandi mutindu yina.

203 Mu tubaka, “Katula sapatu ya nge.” Yandi talaka munu na ngitukulu mingi, mutendudi. Mu tubaka, “Katula sapatu ya nge.” Yandi kangulaka bansinga ya yawu. Samu mu monaka yawu na vision, yina zolaka salama. Yandi katulaka yawu. Ntangu yandi vutulaka yawu mpe yandi tambulaka tii kisika mu vwandaka, makulu nionso zole vwandaka mbote, yandi tambulaka mutindu yandi vwandaka na makulu zole ya malumu. Mu tubaka, “Nge zola tambula na manima mpe na ntwala?”

204 Yandi bandaka kuboka mutindu yina, ke vutuka na manima mpe ke kwenda na ntwala, yandi zabaka ve yinki kusala. Yandi vwandaka tambula mutindu yina, yandi tubaka, “O Allah! Allah!”

Mu tubaka, “Yesu! Yesu!”

Oh, oh, oh! “O Yesu! Yesu,” na manima. “Yesu! Yesu,” mutindu yina.

Mu tubaka, “Ya ke na bakiuvu, bakiuvu kele?”

205 Julius Stadskev, bantu yikwa me zaba yandi? Mpangi Stadskev kwisaka awa na yinzo-Nzambi; yandi me kwenda

kaka—kaka na Allemagne. Yandi tubaka, “Vingila fioti, Mpangi Branham, vingila fioti.” Samu na kubokila photographe na nswalu nionso. “Mu lenda baka foto ya yandi?”

Mu tubaka, “Sala yawu.”

²⁰⁶ “Kwisa *awa*, telega *awa* na sapatu ya nge.” Yandi telemaka mutindu yayi, yandi bakaka foto ya mwana-bakala yina kuna, na makulu ya mbote nionso zole mpe ya kusungama mutindu ya lendaka vwanda. Ya vwandaka na sapatu ya yandi ya ntama na appareil orthopédique, mutindu *yayi*, mutindu *yayi*.

²⁰⁷ Mu tubaka, “Bantu yikwa na kati ya beno ba-Musulman ntangu yayi ke manga Mahomet mutindu profete, mpe ke kwikila ti Yesu kele Mwana ya Nzambi, mpe ke ndima Yandi mutindu Mvulusi ya beno mosi?” Maboko mafunda kumi telemaka na zulu. Alleluia! Ba zolaka ve. . .

²⁰⁸ Ba ke meka na kubumba yawu samu beto kele “ba-exalté,” ba ke bokilaka beto, beno me mona. Kaka mutindu mosi, kasi Nzambi ke na kusala kaka. Yandi ke na kutula Dibundu ya Yandi na kisika. Yandi ke kusala ya mingi, ya kulutula yina nionso beto lendaka kusala to kubanza. Yandi ke kaka Nzambi na nkokila yayi mutindu Yandi vwandaka ntangu nionso.

²⁰⁹ Na yawu, bankundi ya munu ya fioti, beno bika mu tuba na beno kima mosi na ntangu yayi. Bankundi ya munu ya luzolo ya ntalu, beno yina kele awa na yinsi yayi, mpe bayanka yina ke na bayinsi yina ba ke kuwaka ba-bande na bayinsi ya banzenza mpe bisika nionso beno kele, beno vwanda na boma ve. Mambu nionso ke tambula mbote. Tata Nzambi, na ntwala yinza kusalama, zabaka bima nionso yina ke salama. Mambu nionso ke na kutambula landila manaka. Beno zola Yandi? Beno bumba ntima ya beno ya kusungama.

²¹⁰ Mpe, beno bambuka moyo, ntangu pema yayi ke bika luzingu yayi, beno biboba to beno bantwenia, beno bamama, ntangu beno ke mona ba-bébé ya beno ya fioti, mwa bébé yina ya kento yina kufwaka ntangu yandi vwandaka na bamvula nana to bamvula tanu, yandi ke vwanda kento ya ntwenia ya kitoko ntangu beno ke mona yandi. Kiboba yina ya Nkooko yina ya bakala yina vwandaka ya kufumbama, yandi vwandaka na mpasi ya kumona kisika ya ke kwenda; ntangu beno ke mona yandi, nkooko ya kento, yandi ke vwanda ntwenia ya bakala, ntwenia pene ya bamvula makumi zole, kaka na kati ya buntwenia. Mpe yandi ke vwanda mutindu yina kukonda nsuka. Beno lenda simba diboko ya yandi, beno lenda pesa yandi mbote. Beno ke dumuka na zulu ya yandi, kasi yandi ke vwanda ve “mwa bakala ya munu,” yandi ke vwanda “mpangi-bakala.” Oh, la la! Yandi ke vwanda kulutula “mwa bakala.” Nge banza ti nge vwandaka zola yandi? Ya kieleka ti nge vwanda zola yandi. Kasi yina vwandaka *phileo*; beno vingila fioti ti beno kuzwa *agapao*. Beno vingila ti zola yina ya kieleka ya Kinzambi kukota, na

manima beno tala yina kele. Awa ke mutindu fulu mosi ya ntama ke basisa mulinga, ya ke na kima ya mbote ve, ya ke na kima mosi ve. Kima mosi kaka mu ke longisila beno na kusala ntangu yayi, ya ke, bankundi ya munu—ya munu—ya munu . . .

²¹¹ Mwa ntangu fioti na ntwala mu ke . . . Beno zola ti kilumbu mosi mu landila makapu zole yina yankaka? Mfumu . . . Mu—mu ke pema fioti na ntwala ya Chautauqua. Ntangu yayi, mu lenda longa bima yayi ve na balukutakanu yina. Ya ke na mingi ya ku- . . . ya ke na balukwikilu mingi. Beno me mona? Yayi ke kaka samu na dibuundu. Beno me mona? Mu lenda ve . . . Mu ke na muswa ya kulonga awa konso kima yina mu me zola. Yayi ke tabernacle ya munu, beno me mona, mpe mu ke na kutuba na beno. Ntangu yayi, mu ke kwikila ti bantu yina kele ya kuvuluka. Yinga, tata, ya kieleka mu ke kwikilaka yawu. Kasi, oh, ya ke kitoko mingi na kutambula kana beno me zaba kisika beno ke na kutambula. Ya ke mbote mingi, kuzaba, kuzaba yina beno ke na kusala, beno me mona, na kisika kusosa-sosa, na kutekitaka. Beto telema kaka na kati ya Nsemo, mpe beto tambula na kati ya Nsemo mpe na kuzabaka kisika beno ke kwenda. Yina ke ya kieleka. Mfumu kuvwanda na beno.

²¹² Mpe kana beno nionso na kati awa ntangu yayi me bakaka ntete kisika ve! Beno lenda vwanda mama ya yinzo. Mbote, beno ke tuba, “Mpangi Branham, mu me salaka ata kima ve na luzingu ya munu. Mu ke mulongi ve.” Mbote, mbala yankaka Nzambi me nataka beno awa samu na kusansa dibuta mosi, mbala yankaka dibuta mosi ke basika na dibuta yina mpe na dibuta yina mwana mosi ke basika yina ke vwanda mulongi yina ke tinda ba-million ya mioyo na Klisto. Beno fwana vwanda kuna. Beno kele awa samu na lukanu mosi. Beno me zaba yawu?

²¹³ Mbote, beno ke tuba, “Nionso mu salaka, vwandaka, mu vwandaka kubuka bitini ya ntoto. Mpe mu vwandaka kwenda, bankokila nionso, mu vwandaka zaba ve wapi mutindu kusala samu kuvutula mvutu na bansatu ya bana ya munu. Mu vwandaka bana yayi ya fioti yina vwandaka kukondwa basapatu. Mu vwandaka kuna mpe mu vwandaka kudila. Mu kuzwaka mwa pusu mosi, mpe munu na Mama vwandaka kwenda na yinzo-Nzambi.” Kuvwanda na boma ve, mpangi. Landila kaka na kuzola Yandi, Yandi ke na lukanu mosi samu na nge. Nge bikala kaka na nzila yina nge kele, landila kaka na kukwenda na ntwala. Beno me mona? Beno lendaka longa mpe ata dilongi ve, kasi beno lendaka vwanda nkooko ya nkooko ya yina ke sala yawu.

²¹⁴ Beno me zaba ti Nzambi pesaka kiyeka ndimaka ti (Beto tala yawu ntangu, yinki vwandaka nkumbu ya yandi?) Levi, ti ya futaka mosi ya kumi ntangu yandi vwandaka na kati ya ba-rein ya Abraham, ntangu Melchisédek kukutanaka na yandi? Bantu yikwa me zaba yawu? Mpe beto tala. Abraham butaka Isaac, Isaac butaka Jacob, Jacob butuka Levi; yina vwandaka tata,

nkooko, nkooko ya nkooko; ntangu yandi vwandaka na kati ya ba-rein, na kati ya nkooko ya nkooko ya yandi, Biblia me ndima ti yandi futaka mosi ya kumi na Melchisédek. Oh, la la, la la, la la! Mpangi-bakala! Oh! Mu ke . . .

²¹⁵ Ya ke na mwa—ya ke na mwa Mungelesi mosi yina balulaka ntima na nkokila mosi kuna na Angleterre, yandi tubaka, “Mu ke na kese mingi! Mu ke na kese mingi!”

²¹⁶ Yinga, kiese mingi na kuzaba ti yina ke ya kieleka! Mpe kilumbu mosi ya nkembo, mu zaba ve ntangu kilumbu yina ke vwanda, kasi kana yina vwandaka vision, mu ke tuba ti mu vwandaka awa. Beno bambuka moyo, beno zimbana yayi ve na mabanza ya beno, mpe bayina ke na ba-bande kusala mutindu mosi. Ata ti mu kuzwaka vision mosi, to mu me natama na Mpeve, mu zaba ve. Kasi ya vwandaka kaka ya kieleka mutindu mu me simba Mpangi Neville mutindu *yayi*, ya kieleka kaka. Mpe mu lendaka kutala mpe kutuba na bantu yina. Mpe kuna vwandaka kento ya munu ya ntete, yandi bokaka ve “bakala ya munu,” yandi tubaka, “mpangi ya munu ya luzolo.”

Kuna vwandaka na mwana-kento yina mu vwandaka basika na yandi bamvula mingi me luta.

²¹⁷ Ya lenda vwanda na muntu mosi ya dibuta ya yandi awa, Alice Lewis ya Utica, Muklisto ya kento ya mbote mingi, ya luswaswanu. Yandi kwelanaka fioti na nsukinina, mpe yandi kufwaka ntangu yandi butaka bébé ya yandi ya ntete. Alice Lewis, mu kwendaka kuna na yinzo ya matanga samu na kutala yandi. Mu katukaka na kuvutuka na yinzo, mu kuwaka ti yandi me kufwa. Mu kwendaka kuna, ya vwandaka na muntu ve na kati ya kivinga, mu tubaka, “Ya ke na kento mosi awa, Mama . . .” Nkumbu ya yandi vwandaka Emmerke. Mpe yandi kwelanaka na mwana-bakala mosi ya Muklisto, mpe yandi vwandaka mwana-kento ya Muklisto ya mbote. Mu me kwendaka na mwana-kento yina bisika nionso, na bisika ya mutindu na mutindu mpe bisika nionso. Mpe beto vwandaka kaka bana, ya bamvula kumi na nana, kumi na yivwa, bisika nionso, Muklisto mosi ya mbote, mu zabaka ata fioti ve kima mosi samu na yandi kasi Buklisto ya kieleka. Mpe mu vwandaka nsumuki. Kasi mu vwandaka basika na yandi. Mu kotaka . . . Mpe bakala ya yandi vwandaka Muklisto yina me butuka mbala zole, bakala ya kieleka. Mpe mu vwandaka zaba ve; mu zabaka ti yandi me kufwa, mu monaka yawu na zulunale. Mpe mu kwendaka kuna mpe ba tubaka na munu. Mu kwendaka kuna na sika ya Coots mpe mu tubaka, “Beno ke na Mama Emmerke?”

Yandi tubaka, “Billy, yandi ke na kati ya kivinga kuna.”

²¹⁸ Mu kotaka kuna na kati mpe mu telemaka kuna na lweka ya sanduku. Mu banzaka, “Alice, mu kwendaka na kivinga ya mudidi mingi, mu kwendaka na banzila ya mudidi. Nge na munu me tambula kintwadi kuna na banzila mpe na lweka ya

banzadi, ntangu ba vwandaka na bamasuwa ya musiki, beto vwandaka vwanaka kuna samu na kuwa orgue ya mupepe kubila. Beto vwandaka tambula na babala-bala nge vwandaka kieleka mama! Mu tonda Nzambi mingi samu na luzingu ya nge. Pema, mpangi ya kento ya luzolo, pema na ngemba ya Nzambi.”

²¹⁹ Mpe kilumbu yina na nkokila na kati ya vision, ya vwandaka kwisa mbangu kuna na munu. Yandi tubaka, “Mpangi ya munu ya kusakumuka,” mpe yandi losaka maboko ya yandi na zulu ya munu. Oh, oh, mpangi-bakala mpe mpangi-kento, ya me sobaka munu. Mu lenda ata fioti ve kuvwanda diaka mutindu mosi. Ya ke ya kieleka mingi! Ya ke—ya ke kaka kieleka mutindu mu ke na kutala beno, ya kieleka kaka. Na yawu, boma kele ve. Mu lenda kufwa na ntuala ya nsuka ya mpimpa.

²²⁰ Mu ke zola kusansa mwana ya munu ya bakala kuna na manima, Joseph. Mu ke zola kumona yandi na chaire, na ntangu mu lenda baka Biblia yayi. . . ntangu mu ke kuma kisika yina mu ke mona Joseph na chaire ke longi mutindu mwana-bakala ya ntwenia yina me fuluka na Mpeve-Santu, yina me pakulama na Mpeve ya Nzambi na zulu ya yandi. Mpe mu ke kwikila ti yandi ke vwanaka profete. Kilumbu yina ntangu mu—ntangu mu—ntangu mu monaka yandi bamvula sambanu na ntuala yandi butuka, beno ke bambuka moyo ti mu tubaka na beno ti yandi ke kwisa. Beno ke bambuka moyo ntangu mu bokilaka yandi, kuna pene-pene ya autel, kukondwa kuzaba yina mu vwandaka kutuba, na kubiekaka ba-bébé, mu tubaka, “Joseph, nge ke profete.”

²²¹ Mpe kilumbu yina yandi vwandaka na lupangu, yandi kwisaka na munu, mpe yandi tubaka, “Papa, Yesu ke vwandaka na diboko mutindu ya nge?”

Mpe mu tubaka, “Mbote, yinga, mwana. Samu na yinki?”

²²² Yandi tubaka, “Mu vwandaka ya kuvwanda na velo ya munu, mu vwandaka vingila ti Sarah” (yina ke leki ya yandi ya kento) “kukwisa vutuka na lukolo.” Yandi vwandaka kuna na nganda. Mu ke pesaka yandi muswa ve ya kukwenda na bala-bala, yandi vwandaka ya kuvwanda kuna na manima mutindu yayi. Mpe yandi tubaka, “Mu talaka na zulu, mpe,” yandi tubaka, “ntangu mu talaka, ya vwandaka na diboko mosi mutindu ya nge, na diboko ya simisi yina vwandaka kuna na zulu ya munu.” Mpe yandi tubaka, “Na manima yawu mataka.” Yandi tubaka, “Yina vwandaka diboko ya Yesu ke mata na zulu?” Mu talaka mama ya yandi, mama ya yandi talaka munu. Beto kwendaka na yinzo ya Mama Wood. Ya ke ya kuvwanda awa, kisika mosi. Beto yufulaka yandi bakuvu, mosi na manima yankaka, mpe na mutindu nionso beto lendaka sala yawu. Ya vwandaka vision. Yandi monaka yawu. Ntangu mu ke mona Joseph ya fioti ke telama. . . Mu banza ti mu ke zinga mingi samu na kumona yandi kukwelana, kana Yesu me sukinina.

223 Mpe mu ke kiboba ya bakala, mu ke na mika ya mpembe pene-pene ya nkingu ya munu awa. Mu fidisaka . . . Mu ke zola kutinda diaka ba-million zole to tatu ya mioyo na Klisto kana mu lendaka sala yawu. Ya ke lukanu ya munu ya kulonga Nsangu ya mbote bisika nionso ya ntoto. Yinga, tata. Na yawu, sadisa munu, Nzambi, mu ke sala yawu. Na yawu, ntangu mu ke mona ntangu yina, Mpangi Mike.

224 Mu lenda tala ntangu Mama, Meda, mu ke bokila yandi mutindu yina, cherie ya munu, beno me mona, yandi ke . . . beto ke na kununa, mu ke mona bansuki ya yandi ke na kukuma mpembe, mpe mu ke tala mutindu beto ke kunieka, ya kulemba.

225 Rebecca, mu ke vutula matondo mingi samu na Rebecca. Mulongi ya yandi ya musiki tubaka na munu kilumbu yina na mpimpa, yandi tubaka, "Oh, kana yandi landila mutindu yina, Mpangi Branham," yandi tubaka, "ya ke mpasi na kutuba yina yandi ke sala." Beno me mona, yandi ke yika mayele ya yandi na musiki. Mu ke zola ti yandi, mpe mu ke zola . . . Mu ke zola kumona Sarah na Orgue, Becky na piano, mu ke zola kumona Joseph na chaire.

226 Ntangu mu ke mona yina kusalama, mpe munu na Mama beto ke kota na kutekitaka, mu me simba nkawa ya munu ya ntama, na nkokila mosi, mu ke kwisa na bala-bala, mpe mu ke tala kuna na kati mpe mu ke mona mwana ya munu ya bakala me telama kuna ya kupakulama na Mpeve-Santu, ke longi Nsangu ya mbote mosi yayi. Mu ke zola kubaka Buku yayi ya ntama, mpe mu ke tuba, "Mwana, Yawu yayi, Yawu ke ya nge. Kangama na Yawu, kukakula Ndinga mosi ve. Nge kangama kaka na Yawu, cheri. Ve, kukipe ve, mu ke kipe ve yina ke telemina nge, ya vwanda nani, Nzambi ke vwanda samu na nge. Longi Ndinga nionso kaka mutindi ba me sonika Yawu Kuna na kati, mpe Papa ke mona nge na simu yina ya nzadi." Mu ke zola lutisa diboko ya munu nziunga-nziunga ya yandi, kento ya munu, mpe kuzabuka Jourdain.

227 Na kuvingilaka ntangu yina, Nzambi, bika mu bikala na kisika ya kisalu, ya kwikama! Beno pesa munu muswa! Mu ke kipe ve ntalu ya kele, to yikwa, yina mu ke sala, to *yayi, yina to yankaka*. Beno bika mu bikala ya kwikama mpe ya kieleka na Ndinga ya Nzambi ya moyo, ti ntangu kilumbu yina ke kwisa samu mu zabuka na simu yina kuna, mpe mu ke tala kuna mpe mu ke tuba, "Beni yina kuna. Oh, nkundi ya munu ya ntalu, mpangi ya munu ya ntalu, mpangi ya munu ya kento."

228 Mulongi ya ntwenia, beno kwenda na kisika ya kisalu, beno bikala kuna na kisika ya beno. Milongi nionso ya bantwenia mpe bayankaka, beno bikala ve ya kuvwanda. Beno bikala ve ya kuvwanda mpe kukondwa kusala kima mosi. Beno basika kuna mpe beno kwenda nunga moyo mosi. Beno sala kima mosi!

Beno kwenda, beno sala kisalu. Beno sikama ve, nge mulongi ya ntwenia kuna. Nzambi kusakumuna ntima ya nge.

²²⁹ Yandi ke bambuka munu moyo ntangu mu vwandaka na mvula yina, mu banza, mpe mbala yankaka leki mingi kulutila yandi. Mu vwandaka kaka na bamvula pene-pene ya bamvula makumi zole na ndambu ntangu mu tulaka ditadi yina ya nsongi kuna. Mu ke bambuka moyo mu vwandaka lwata kazaka ya bleu na pantalon ya mpembe, mpe mu telemaka kuna mpe mu tulaka ditadi yina ya nsongi pene ya bamvula makumi tatu na mosi me luta. Beno me mona bamvula yikwa mu vwandaka na yawu, mu vwandaka kaka ntwenia ya bakala. Mu telemaka kuna, mu tulaka ditadi yina ya nsongi. Mu me kakulaka ata Ndinga mosi ve. Mu me bikala ya kukwikama na Yawu kaka mutindu mu tulaka ditadi yina ya nsongi. Kimbangi ya munu ke kuna na kati, kisika mu sonikaka yawu kuna na zulu ya dititi ya ntete ya Bible, mpe mu katulaka yawu mpe mu tulaka yawu kuna na kati ya ditadi yina ya nsongi, mpe ya ke kaka kuna. Mpe bika ya sonama na zulu ya matiti ya Ndinga ya Kukonda nsuka ya Nzambi na Zulu. Bika mu bikala ya kwikama tii na nsuka.

Beto kulumusa bayintu ya beto ntangu yayi na muniti mosi samu na kusambila.

²³⁰ Na ntangu ya nsuka ya nkokila yayi, na nsuka ya yayi, kapu mosi, ya ke mbote ve ti ya vwanda mutindu yina. Beno fwana vwanda na yina yankaka, mpe wapi mutindu ya ke kwenda na ntwala mpe ke tula Dibuundu na kisika ya Yawu. Mu ke talisa yawu na beno mosi ya bilumbu yayi, kana Nzambi kuzola. Mu fwana pema fioti ntangu yayi na ntwala mu kwenda kuna na Chautauqua, na lukutakanu yankaka ya nene, na manima mu ke katuka kuna samu na kukwenda na Oklahoma, katuka kuna mu ke kwenda kuna na Klamath Falls, na manima mu ke katuka na Klamath Falls mu ke kwenda na Californie, kuna na Yakima, mu ke vutuka ve tii na kilumbu ya 15 ya Ngonda ya nana.

²³¹ Kasi beno tala, beno bika mu yufula beno kima mosi, kana kima mosi lendaka salamina beno to munu na ntwala ntangu yina kukwisa, kana mu lendaka zabuka na simu yina ya nzadi samu na kukota na Yinsi yina, to kana beno lendaka zabuka na simu yina ya nzadi na ntwala ya ntangu yina samu na kukota na Yinsi yina, beno ke na kuwa kivuvu na nkokila yayi ti beto ke kutana kuna na Kisika yina? Kana ya ke mutindu yina, beno telemisa maboko ya beno na zulu, beno tuba, “Mu ke kuwa kivuvu yina na kati ya ntima ya munu.” Nzambi sakumuna ntima ya nge. Nzambi sakumuna nge. Kana ya ke na mosi awa yina ke kuwa ve kivuvu ti ba ke vwanda kuna, mpe lendaka kutuba, “Bambuka munu, Mpangi Branham, ti mu kuvwanda na kivuvu yina,” telemisa diboko ya nge, “Mu zola kuvwanda kuna, mpe.” Nzambi sakumuna nge, mama. Nzambi sakumuna nge.

²³² Tata ya beto ya Mazulu, beto ke natila Nge dibuundu yayi

na nkokila yayi, diboko nionso, mutindu mu me zaba, yina vwandaka na zulu, nionso kasi muntu mosi, moyo yankaka ya ntalu yina me vwanda awa na manima, ya kulemba mwa mingi to ba ke zabuka na Yinsi yina kuna, kisika ya ke na zola mingi ya kieleka ya Kinzambi na kati ya bantima ya bawu, na kati ya ntima ya ntalu ya kento yina, ti yandi zola kwenda na Yinsi yina kana yandi lendaka kufwa na nkokila yayi, ya lendaka benda moyo ya yandi ya kulemba mingi na Yinsi ya Nsilulu ya Nzambi?

²³³ Tata na Zulu, mutindu mu me telama awa na chaire yayi mpe mu me longa, mpe mu me toka, mpe mu me boka, mpe mu me dodokila, mpe me ndimisa, bika mu lombana na Nge mbala mosi diaka, Mfumu, bika mu lombana samu na mpangi ya munu ya kento kuna na manima; Nzambi, tula na kati ya ntima ya yandi, na nkokila yayi, zola yina ya Kinzambi, Mpeve-Santu yina ya Nzambi, ngemba yina me luta lubakulu nionso, ti yandi ke kuzwa Mpeve ya Nge, ya ke baka kidimbu na Mpeve-Santu tii kilumbu yina. Mu ke zola kumona yandi, Mfumu, ntangu beto ke zabuka kiamvu yina. Kana ya ke—kana ya ke—kana ya ke ntangu ya munu ya mbote ya kuzabuka, kana yina Nge talisaka munu kele ya kieleka, mpe mu ke zabuka na simu yina kuna, mu ke zola kukutana na yandi kuna, mpe kumona yandi ke kwisa mbangu mpe ke simba munu na diboko, mpe ke tuba, “Mpangi ya munu ya ntalu, ya vwandaka na nkokila yina ti Kima mosi tubaka na munu na kuzangula diboko ya munu na zulu, ntangu nge vwandaka longa Buku ya ba-Ephésien. Mu telemisaka diboko ya munu, mpe kima mosi salamaka na munu na manima ya yina. Munu yayi. Mu ke ntwenia ntangu yayi kukonda nsuka.” Nzambi pesa yawu na muntu yina ya ntalu.

²³⁴ Bantu yayi me telemisa maboko ya bawu na zulu ti ba me tula bawu kidimbu na Mpeve-Santu, Mpeve ya Nzambi ke na zulu ya bawu, mpe ba me kuzwa Mpeve-Santu, ba me tula bawu kidimbu na zola yina ya bunzambi na kati ya bantima ya bawu. Beto ke tonda Nge mingi samu na bawu.

²³⁵ Na kuzabaka, Tata, kuna na yinza yina ba-bande yayi ke kwenda. Ba me kitisa ba-Microphone na nsongi na nsongi ya chaire yayi, yina zola tuba ti ba ke na kusalaka ba-bande, ya ke baluka kuna, Ndinga ke kwenda na bayinsi ya mutindu na mutindu na yinza ya muvimba, na yinza ya muvimba, makumi zole to makumi tatu ya bayinsi ya luswaswanu ke kuwa Yawu. Mu ke sambila samu na muntu nionso yina ke kuwa bande yayi, yina ke na kivuvu yina ve ya Luzingu ya Kukonda nsuka, yina ke na mbotika ya Mpeve-Santu, bika Yawu kwisa na bantima ya bawu na lembami nionso. Pesa yawu, Mfumu.

²³⁶ Mpe bika ti munu, kana mu me mona bawu ve na luzingu yayi, ntangu mu ke zabuka na Yinsi yina kuna, bika bawu kwisa mbangu mpe bawu simba munu (mpe mu simba bawu, mpe bawu, beto boka ngolo, “Mpangi ya munu ya ntalu!” mosi na yankaka), ba ke tuba, “Mu kuwaka bande ya nge samu na ba-


Ephésien, mutindu Nzambi zabaka beto na mantwala samu na Luzingu ya Kukonda nsuka, mpe ya vwandaka na bande yina mu yambaka Ndinga ya Nzambi mpe mu bakaka kidimbu na Mpeve-Santu kati na Kimfumu ya Nzambi.” Pesa yawu, Tata.

²³⁷ Belusa bayina nionso ke bela mpe ke na mpasi. Nkembo kuvwanda ya Nge samu beto ke bika nionso yayi samu na Nge na bangolo nionso na Nkumbu ya Yesu, Mwana ya Nge. Amen.

²³⁸ Ya ke na bantu awa yina kele bambevo mpe yina ke zola ti ba tetika maboko na zulu ya bawu samu na kusambila samu na bawu? Beno zola telemisa maboko ya beno? Mbote mingi. Beno lenda kwisa na piwa nionso, ntangu yayi, awa na autel, mpe kutelema na mwa ntangu fioti, na ntangu Mpangi Neville ke kwisa na . . .

²³⁹ Oh, yayi ke monana mutindu, kusambila samu na bambevo, ya ke monana kaka—kaka ti beno vutuka bisika ya beno, ya kieleka. Nzambi kuzaba nionso samu na yawu.

²⁴⁰ Ntangu mu ke kuwa nkunga yina . . . Beno bambuka moyo, kana beno ke zinga ntangu mu ke kwenda, beno bula yayi samu na munu: *Kwikila Kaka*. Beno bambuka moyo, mu ke ya kufwa ve, mu ke zola ve kuvwanda ntama ya beno samu na kuwa yawu. Mu lenda kufwa ve; Yesu pesaka munu Luzingu ya Kukonda nsuka; Ya ke vumbula munu na lufwa na kilumbu ya nsuka; mu ke mona beno. Mpe kana mu me kwenda, mu ke kwikila mutindu mosi samu na beno. Mu ke kwikila ti beto ke kutana diaka mosi na yankaka.

²⁴¹ Mu ke tala, mama yayi ya ntalu me telama awa na bansuki ya pembe. Nge ke Muklisto? Ya me fuluka na Mpeve ya Yandi, ya ke na kuingila nkwezulu ya Yandi, yandi me telama awa na kuingilaka Masuwa kukwisa. Amen. Oh, mpangi-kento . . . 

60-0522E Lukumu Ya Bana #4
Branham Tabernacle
Jeffersonville, Indiana U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kiasadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org